

12
PLE III

0

SI OFFICINA?

150

D

33

NAPOLI

BIBL. NAZ.

VITT. EMANUELE III

150

D

33

NAPOLI

102 N-33

C.

~~190~~

~~102~~

~~2 190~~

163

D E
R O M A N Æ
H I S T O R I Æ

Scriptoribus

E X C E R P T A A

BALTHASSARE BONIFACIO


Ex Bodino, Vossio, alijsque.

SUPERIORVM PERMISSV, ET PRIVILEGIO.



V E N E T I I S, M D C X X V I I.

Apud Antonium Pinellum.



HEROI MAGNO.

Et Musarum parenti,

DOMINICO MOLINO:



Balthassar Bonifacius S. D.



Vadraginta rei Romanæ
scriptorum elenchum ,
iussu tuo , Domine , con-
feci . Ædificium , mole
quidem exiguum , non
tamen sine ingenti labo-
re , atq; industria summa

ad fastigium perductum . Restabat vt tuo no-
mine inscriberetur , statimq; ingredientibus
Genius tuus pro foribus præsto esset , qui bo-
nos tutò deduceret , malos aut ingressu , aut
obtrectatione prohiberet . Tibi verò potissi-
mum Historici debebantur , qui omnes pro-
peimodum Historicos rectè factorum tuorum
narrationibus defatigas . Cygnos tibi offerre
æquum erat , qui inter Cygnos natus , atq;

† 2 edu-

educatus, non modò ipse cygneum canas, sed
alijs quoque suauem cantionem inspires.
Nam quod Philostratus de Apollonio suo
speciosè mentitus est, id ego de te, nostro
Apolline, dicam verè, à Cygnorum choro
tuos esse natales exceptos, & magna hilarita-
te concelebratos, felicibus quibusque aui-
bus applaudentibus. Nempe is futurus eras, vt
tuis auspicijs, & si quis natura abhorreret à
Musis, vt Euripides inquit, elegans subitò,
atq; eruditus euaderet. Mirabuntur fortas-
se qui hæc nostra legerint, me, tanquam bom-
bylium, inani susurro ausum esse obstrepere
suauissimis antiquorum occentibus; eosq; in-
ius vocare, qui, iam dudum inter Diuos re-
cepti, ab omni humana censura putantur
immunè. Sed enim viam institi, quam præ-
iuit Sigonius, quamq; autoritate tua stra-
tam, & munitam, ipse mihi indicasti. Quod
si ego hisce Viris iudicandis longè à scopo
aberrauero, tu meritis, Domine, collimare,
& vmbonem ipsum attingere, *Ut contra si
quis sentiat, nil sentiat*, quemadmodum ele-
ganter dixit Sedigitus.

Vale. Taruisio V. Non. Octobr. MDCXXVI.

A D
DOMINICVM MOLINVM,
MAGNVN CONSILII
SAPIENTEM.

Sigonius, Vir summe, tuas quanquam imbuir aures,
Obsecro ne spernas hoc teretissimæ meum.
Postea quam Priamum magna obstupere loquentem,
Astyanacta loqui curua theatra sinunt.
Auriculas philomela canens ubi mulsit heriles,
Non ingrata suum pica salutat herum.
Nullius, aut minimi precij bellaria, lauti
Delicias epuli claudere sæpe solet.

Balthassar Bonifacius.

SENATORI NOBILISSIMO.
ET SAPIENTISSIMO
DOMINICO MOLINO.



Balthassar Bonifacius S. D.



*ON me latet, Vir Sapien-
tissime, hunc librum sum-
mis illis, & selectis inge-
nijs, quibus ego placitura
non scribo, crambem re-
coctam meritò visum iri.
Etenim iudicium, atq; e-
lenchum Historicorum iam olim Antonij tres
Viperanus, Posssevinus, & Riccobonus, συ-
ναγωγὴς meus, Petrus item Crinitus, Ioan-
nes Bodinus, Franciscus Patritius, Theodo-
rus Zuingerus, Iustus Lipsius, David Chy-
traus, Claudius Verderius, Carolus Sigonius,
Gherardus Vossius, alijq; non pauci, quadam,
ut ita dicam, rivalitate, atque emulatione,*

con-

confecerunt. At mihi in hoc opere elaborando ea sola mens, id consilium fuit, tibi ut gratificarer postulanti, vel potius obtemperarem precipienti. Hoc tamen fortasse musopatagi non sunt credituri; neq; ego sanè illos persuasum ibo; satis mihi ratus fore conscientiam facti, tuumq; Vir Amplissime, testimonium; qui probe noris utrum id mihi seriò praeceperis, adactò etiam ad iugulum verenda cuiusdam, & plusquam herilis autoritatis gladio, quem nunquam herclè strinxisti, quin mihi parendi necessitatem incuſeris. Vale.

Tarvisio. IV. Non. Octob. MDCXXVI.

HISTORICORVM NOMINA;

Quorum in hoc opere scripta censentur.

I.	Polybius.	XXI.	Capitolinus
II.	Cæsar.	XXII.	Lampridius.
III.	Sallustius.	XXIII.	Trebellius.
IV.	Diodorus.	XXIV.	Vopiscus.
V.	Dionysius.	XXV.	Spartianus.
VI.	Liuius.	XXVI.	Vulcatius.
VII.	Valerius.	XXVII.	Eutropius.
VIII.	Velleius.	XXVIII.	Ammianus.
IX.	Plinius sen.	XXIX.	Aurelius.
X.	Plutarchus.	XXX.	Orosius.
XI.	Tacitus.	XXXI.	Rufus.
XII.	Frontinus.	XXXII.	Zosimus.
XIII.	Plinius iun.	XXXIII.	Procopius.
XIV.	Suetonius.	XXXIV.	Agathias.
XV.	Appianus.	XXXV.	Iornandes.
XVI.	Æmilius.	XXXVI.	Marcellinus.
XVII.	Florus.	XXXVII.	Beda.
XVIII.	Iustinus.	XXXVIII.	Diaconus.
XIX.	Dion.	XXXIX.	Anastasius.
XX.	Herodianus.	XL.	Zonaras.

ROMANÆ HISTORIÆ
SCRIPTORIBVS
EXCERPTA

A BALTHASSARE BONIFACIO
Ex Bodino, Vossio, alijsq; .

I.



POLYBIVS, Lycortæ filius, natione Arcas, patria Megalopolitæ, gente Patritius, quadraginta voluminibus non Romanorum solum, & si horum in primis, sed simul aliarum Orbis gentium res gestas complectitur; quamobrem Historiam suam Catholicam vocat. Ex omnibus Polybij scriptis, quinque priores libri integrî ad nos peruenerunt primùm; reperta deinde fragmenta duodecim librorum sequentium; lectiones item ex omnibus historiarum libris collectæ: preciosa me Hercules analecta, ac inter cimelia, non sine quadam veneratione, asseruanda: quibus docemur cur nam Romani post clades à Pœnis acceptas emerferint, & ad summum potentiæ fastigium

ftigium peruenerint: Quomodo instituendus optimus imperator, & quibus artibus in primis instructus esse debeat: Quo pacto signa per faces dare maximè oporteat: Qua ratione potuerint Romani superare phalangem, quæ Macedonibus immortalis habebatur, eiusq; naturæ, vt vinci nequaquam posset. Damnatur Polybius impietatis, quod de religionibus nefariè scripserit. Quem scopulum dum effugeret Liuius in superstitionem impegit, hoc enim ferè comparatum est, vt dum vitia fugimus, in contraria curramus, quemadmodum sapienter dixit Horatius. Sed Liuius excusatione dignior, quàm Polybius, videtur; propterea quod superstitione præstat, quàm impietate contaminari, & falsam, quàm nullam habere religionem. Ex antiquis in hunc scriptorem genuinum fregit Scylax Geographus, aut Sillographus potius, ex recètioribus Sebastianus Maccius, pædagogum subinde appellans, terræ filium, iactatorem, periautologon, vaniloquum, ambitiosum, ostentatorem, extra rem non aliò digredientem, nisi vt de se prædicando gloriam sibi compararet; denique præcepta Historiæ conscribendæ nimis affectatè inferentem, quibus ne ipse quidem, qui ea tradebat, vsquequaque paruerit: Quod in eo vitium deprehendisse cū primis profitetur Patritius. Animaduersores, vt ait Vossius, non modò spissa, sed etiam stolidi inscitia.

Quis

Quis enim recti vir iudicij non exosculetur tam benignam scriptoris indolem, qui duplici functus munere Historici, & Philosophi, narret simul, & moneat? Silicet Perotto visus est vno in opere, & summus Historiographus, & Orator maximus, & optimus Physiologus. Testatur etiam Bodinus hunc inter meliores rerum gestarum enarratores verissimum haberi, esse vbique sui similem, eruditum, grauem, in laudibus parcum, in reprehensionibus acerbum, ac, veluti prudentem legislatorem, & bonum Imperatorem, multa de militari, urbanaq; disciplina, multa de Historici officio disputare; locorum verò, ac regionum descriptiones neminem veterum diligentius explicasse; magnamq; Europæ partem, oram Africæ, & Asiam minorem, ut populorum mores observaret, peragrasse. Et nihil sanè tam prope fuisse videtur, quam ut ipse cum paucis ad boni Historici ideam proximè accesserit: Marcus enim Brutus, prudens rerum æstimator, ac propterea subtilis adeo verborum pensiculator, ut ne Cicero quidem ei satisfaceret, tanti Polybium fecit, ut, etiam ultimis atq; afflictissimis patriæ temporibus, partim ad solatium doloris, partim ad vitæ institutionem, non modò legeret studiosissimè, sed quæ ab eo fusius explicata essent, compendio constringeret. Hunc, ut egregiæ prudentiæ virum, rei;q; bellicæ experientissimum, Æmilianus Scipio

domi, militiaꝝq; secum habuit, vt docet Velleius, indiuiduum consultorem. Hic ille est, cuius solertia, quemadmodum scribit Ammianus, porta Chartaginis suffossa, captaq; ciuitas fuit. Hic ille est, qui ab Achiuis ad Ptolemæum Epiphanem in Ægyptum, ad Consules item Romanos in Thessaliam missus, honorificentissimis legationibusungebatur. Hic ille est, qui coram spectauit cladem atq; excidium Vrbs, totius Græciæ florentissimæ, cum bimaris illa Corinthus à Lucio Mummio diriperetur: Vt absq; vlla iactantiæ labe dicere potuerit cum Ænea Maroniano se narrate, quæ ipse miserrima viderit, & quorum pars magna fuerit. Nobis igitur nullam, quam ex eius vel doctrina, vel experientia capere vtilitatem possemus, inuidendam ratus, vno opere, vt diximus, prodere sui temporis Historiam, simulq; praxim tradere instituit ciuilis prudentiæ, tum eius, quæ in administratione reipublicæ versaretur, tum etiam eius, quæ ad militarem disciplinam pertineret; quibus duabus partibus ars illa Regia, quam politicen vocant, absoluitur. Quod ad dictionem Polybij attinet, Dionysius Halicarnassæus incuriam eius reprehendit, & minus accuratam verborum comprehensionem. Sed profectò nihil mirum est elegantiarum orationis parum sollicitum fuisse Virum ferijs rebus, & grauib; semper deditum, cui sufficeret

ceret efficacia sententiarum; incorruptaq; veritas narrationis, quiq; non grauaretur eloquentiae palmarium cedere Herodoto, ac Xenophonti. Quanquam dictionem eius non esse usquequaq; improbandam, vel ex eo constat, quod Liuius, Historicorum disertissimus, integros ex eo libros prope ad verbum describat. Quem tamen noster hic parum candidè nullo alio dignatur encomio, quam scriptoris non contemnendi; nisi id apud Liuium κατὰ λιπότητα dictum intelligamus, quomodo Achilles Homero vocatur non infirmissimus Achæorum. Eadem propemodum parcimonia bonus auctor à Cicerone appellatur: Quem secutus Iosephus virum bonum nuncupauit: Strabo hominem grauem, & serium: Ælianus autem vno verbo plurimas laudes amplectens, virum multiscium: Velleius præcellentem ingenio virum. Denique Perottus gloriatur se egregiam, & luculentam præstantis, & sinceri scriptoris Historiam in lucem Latinam proferre, in qua cum magnitudine, ac diuersitate rerum gestarum splendor quoque verborum coniunctus est, & suauitas orationis quibusdam quasi luminibus sententiarum ita respersa, vt nemo res Romanas, vel verius, vel copiosius, vel maiore cum diligentia prosequatur. Sed Perotto longè eruditior Casaubonus, vt multo ampliorem, & castigatiorem nobis Polybium exhibuit, sic de incom-

comparabili hoc autore melius sensit, omnemque ex eo calumnie maculam deterfit; cum illud confirmare nequaquam vereretur, non posse aliquem neque Græcum inueniri, neque Latinum ex illo meliore seculo, ne dum e posterioribus, quem Polybius non aliqua legitimæ historiæ laude, aut etiam pluribus, antecedit. Quanquam verò dictio Polybiana duriuscula, & parum compta Dionysio censetur, in serijs tamen, magnisque scriptoribus minus interdum culta dictio, nō sine austeritate quadam, inuat; vt poma quædam sunt suauiter aspera, & in vino nimis veteri ipsa nos amaritudo delectat; quemadmodum Seneca eleganter dicebat. Nam quod ad notam impietatis attinet, atrocissimi criminis suspicionē à Polybio propulsauit Suidas, cum testaretur Fortunæ in Polybianis historijs nullum esse locum, & Diuina prouidentia cuncta mortalium administrari. Non deest, sed non eminet in Polybio facundia; nihil verò est iniquius illis, qui nullam putant esse eloquentiam, nisi vbi nihil est præter eloquentiam. Sed facultatem dicendi in autore tam graui laudatum ire par fuerit iniuriæ; qui vt orationis delicijs, & verborū amœnitatibus vni, aut alteri historicorum fortasse est inferior, ita ciuili prudentia, solida doctrina, rei castrensis peritia, sincera fide, exquisito iudicio, grauib; sententijs, imperatorio quodam stylo, & proprijs

proprijs alijs historiæ, omnibus numeris perfectæ, dotibus sic excellit, ut pauci e cunctis, siue Græcis, siue Romanis, cum ipso mereantur componi, anteponi certè nullus. Idque profectò Constantinus Imperator fassus est non tam verbo, quàm facto: Cùm enim in suum pandecten historicum e Diodoro, Dionysio, Iosepho, Dione, & alijs primæ notæ scriptoribus pauca admodum seligeret, Polybium penè totum descripsit, atque operi suo inseruit: Utinam verò illi Augusto eius incæpti nunquam venisset in mētem, ea quidem lege ut integro hoc scriptore frueremur; aut corpus illud saltem ab eo confectum haberemus. At sic erat in fatis, ut ex Græcis Imperatoribus, luctuosa literarum clade, alius Iurisconsultos, alius Historicos nobis eriperet, ut pro Papinianis Bartholos, pro Polybii Zonaras legeremus.

I. I.



CAIVS IVLIVS CÆSAR, culmen humani ingenij, naturæ conatus ultimus, monstrumq; , ut eum Cicero vocat, omnibus admirandum: nam quid attinet Homero primas cum Plinio decernere, cum de Cæsare nihil ferè dici possit, quin de omnium laudibus quippiam detrahatur? Scriptor est purus, & elegans, in verborum structura accuratus,

rus, ac omninò placidi instar fluuij procurrrens; politicus quoque, & grauis sententijs, quo Xenophontem excellit, cæteroqui ei non dissimilis multum. Scripsit Commentariorum de bello Gallico libros septem, de Ciuili tres. Marci Tullij de ijs iudicium est per quàm celebre: Nudi sunt, inquit, recti, & venusti, omni ornatu orationis, tanquam veste, detracto. Sed dum voluit alios habere paratum vnde sumerent, qui yellent scribere Historiam, ineptis gratum fortasse fecit, qui illa volent calamistris intrere; sanos quidem homines à scribendo deteruit; nihil est enim in Historia pura, & illustri breuitate dulcius. De eisdem Hirtius prædicat in hæc verba, Tullianis propè geminà: Adeo probantur omnium iudicio, vt prærepta, non præbita facultas scriptoribus videatur. Cuius tamèn rei maior nostra, quàm reliquorum est admiratio. Cæteri enim quàm benè, atq; emendatè, nos etiam quàm facilè, atq; celeriter eos perscripserit scimus. Doleat meritò Vossius studiosæ iuuentutis vicem, quæ satis infrequens est in nobilissimo, atq; adeo diuino hoc scriptore: Aut si quibus in manu sit, haud aliùs cuiusquam rei legitur gratia, quàm ob eximiam Romanæ linguæ puritatem, verborumq; proprietatem summam; cum ex eo tamen haurire sit preciosam pulcherrimarum rerum suppellectilem. Porro si quid in eo culpandum videtur, hoc

vnum

vnum illud fuerit, quod in his, quæ iure optimo verterentur ei vitio, non satis interdum veritati litauerit: Nam & Asinius Pollio parum diligenter, parumq; integra fide Commentarios conscriptos putat; Cum Cæsar pleraque, & quæ per alios erant gesta incautè crediderit, & quæ per se, vel consulto, vel obliuione, perperam ediderit, quemadmodum testatur Tranquillus. De Cæsare Dictatore, quod ad eius scriptionem attinet, hæc sunt ferè, quæ apud clarissimos autores reperiuntur elogia. Cæsar habet peracre iudicium ait Cicero, & splendidam quandam minimèq; veteratoriam rationē dicendi tenet. Facit eum Tacitus summis oratoribus æmulum. Vocatur ab Hircio præcellentis ingenij, sermonisq; præter alios castissimi. A Valerio Maximo humani ingenij perfectissimum columnen. Ab Aulo Gellio grauis autor linguæ Latinæ, Ab eodem rursus excellentis ingenij, & prudentiæ vir. Denique Fabius Quintilianus hoc illi reddidit testimonium: Caius Cæsar si foro tantum vacasset, non alius ex nostris contra Cicero- nem nominaretur, tanta in eo vis est, id acumen; ea concitatio, vt illum eodem animo dixisse, quo bellauit, appareat. Exornat tamen hæc omnia mira sermonis, cuius propriè studiosus fuit, elegantia. Neque immerito Cæsar vocatur à Plinio inter mortales animi vigore præstantissimus; scribe-

re nanque, & legere simul, dictare, & audire solitus erat; epistolas verò quaternas pariter, & septenas librarijs dictare. Casaubonus Iulij Cæsaris Commentarios diuinum opus, & maximarum, atque vtilissimarum rerum doctrina foetum nominauit. At Paulus Manutius tanti scriptoris hoc ferè tenuit encomium: Eminent inter omnes, primumq; sibi dignitatis gradum Caius Cæsar iurè vendicat; nam, & vixit qua plurimum ætate Romæ floruit eloquentia, & coluit ipse eloquentiam præter cæteros. Rebus verò gerendis non interfuit modò, verùm etiam præfuit; quo factum vt vsum quoq; qui valet in scribenda Historia multum, cum doctrina coniunxerit. Præclari illius Commentarij, quibus nihil habent perfectius. Latinæ literæ, se non solum omnibus omnium Historijs æquare, verùm anteferre etiam videntur. Breuitatem scimus in oratione magnam esse laudem, cum eo tamen si vitetur obscuritas, facilè enim, cum illam sequimur, in hanc incidimus, quod in Thucydide vitiū Marcus Tullius notauit. At Cæsar, cum breuitatem maximè omnium adamauerit, ita tamen presus est, vt eodem nihil fieri possit illustrius. Propriè loquitur, & significanter, & ornamentorum tantum habet, quantum in exponenda re decet: nā elaboratam studiosius orationem, nimiaq; excultam elegantia prudentium aures non modò in-
Com-

Commentarijs, verùm in Historia quoque respuunt.

I I I.



CAIVS SALLVSTIVS CRISPVS, rerum Romanarum, vt de eo cum Tacito sentiam, florentissimus autor, confecit Historiam ab Vrbe condita, quæ deperiit, nec iam superest integrum quicquam, præter bellum Iugurthinum, & Catilinæ coniurationem. Dictionem eius omnes antiqui existimant breuem, ac nervosam esse, & Thucydidis æmulam, ita enim censuit Velleius. Scriptor est inter Latinos planè Atticus, qua laude Demostheni propior est, quàm Cicero ipse, ex Adriani Turnebi sententia. Sed vt Thucydidem multi reprehendunt, ita Sallustium non omnes probarunt. Nam Asinius Pollio notat eius obscuritatem, & audaciam in translationibus, & nimiam priscorum verborum affectationem, quòd dedita opera obsoletas voces ex Catonis originibus excerperet. Quamobrem à Valerio Probo apud Gellium vocatus est nouator verborum, quod scilicet vetera; & iam desita verba recentaret. Exploduntur à Fabio principia, & proœmia Sallustiana, vt nihil ad Historiam pertinentia, nimisq; insulse lamentationum, & querimoniarum plena. Trogus autem Pompeius in Sallustio reprehendit,

B 2 quòd

quòd conciones directas, atq; orationes longas operi suo inferendo, Historiæ modum excefferit. Senecæ verò in Sallustio displicuit obscura breuitas, amputatæ sententiæ, & verba ante expectatum cadentia. Sallustium Adrianus Cæsar adeo nihili fecit, vt ei Cæcilium prætulerit. Flavius item Vopiscus, cum nimis vniuersim neminem scriptorum, quantum ad Historiam pertinet, non aliquid esse mentitum affirmet, Sallustium nominatim ignominia notauit. Vitandam oratori præcipit Fabius Sallustianam breuitatem, & abruptum sermonis genus, quod ociosum fortasse lectorem minus fallit, properantem transcurrit, audientem transuolat; quamuis hoc qualecunque est vitij, in ipso virtutis locum obtinuisse fateatur. Cui subscribens Macrobius, In genere, inquit, dicendi copioso. Cicero dominatur, in breui Sallustius regnat. Quibus gemina sunt verba illa Apuleij: Nec opulentiam requirit Cicero, nec parcimoniam Sallustius. Crinitus verò, Est, inquit, eius oratio tam absoluta, tam casta, & innocens, vt meritò ab eruditis diuina breuitas censeatur. Sed & Fabius ipse alio loco fatetur oratione eius, ac breuitate nihil audiri posse perfectius, præsertim apud vacuas, & eruditas aures. Neque immeritò vocatur ab Aulo Gellio Sallustius subtilissimus breuitatis artifex. Constat porrò ex veterum commentarijs hunc ingenio

genio fuisse acri, & in studijs literarum accurato. Itaque à Vibio Sequestre autor certissimus nuncupatur: Et ab Aurelio Augustino veritatis nobilitate donatur. Et quidem certè optima fide, & perquàm sedula diligentia videtur Historiam composuisse. Fertur enim in partem operis, cum de rebus Punicis ageret, tanto studio incubuisse, ut regiones Africæ adierit, & maxima solertia perlustrauerit, quo maiore sollicitudine veritatem exploraret. Neque verò multum eius gloriæ luminibus obstruxisse arbitramur criticorum, vel calumniâ, vel inuidentiam: Nam, ut Gellius testatur, quamquam multi non mediocri ingenio viri conati sunt reprehendere pleraque, & obrectare, plura tamen inscitè, aut malignè vellicant: Neque impedire potuerunt quominus doctissimorum corda, ut inquit Martialis, diuinarent Sallustium in Romana Historia principem fore: Quos inter Bodinus Sallustium integerrimi scriptoris, liberi in iudicando, magnarumq; rerum usu præditi nominibus decorauit. A Stoicis nescio quibus vapulauit Sallustius, quòd, cum alienæ luxuriæ grauissimus esset obiurgator, & censor, cumq; Metellum Pium fuggillaret, quòd, præter suam, & populi Romani dignitatem, & modestiam, conuiujs in Hispania, omnique luxu vteretur; postea vero ipse, deprehensus in adulterio, loris benè cæsus, poenas in-

con-

continentiæ dedisset; cumq; opibus præter modum afflueret, hortos illos, deliciarum suarum conscios, quorum vestigia adhuc Romæ cernimus, omnibus amoenitatum generibus instruxisset, doctrinamq; suam factis funditus euertisset; & is profecto videtur Casaubono Sallustias fuisse, qui, omnium libidinum seruus, sic aliorum vitijs perpetuo irascere-
tur, quasi inuideret. At nos huiusmodi, veluti scolopulos præteruecti, in historicorum scripta; non in mores, inquirimus.

I V.



DIODORVS, AGYRIO, Siciliæ oppido, oriundus, ætate Cæsaris vixit, vt ipse non semel de se testatur. Longæus tamen fuit, & ad medium vsque Augusti principatum superauit. Vniuersalem Historiam, quam Bibliothecam inscripsit, quadraginta libris absoluit: Quorum sex primi, vt ipse in sua præfatione docet, continebant res ante bellum Troianum gestas, easque, quæ fabulis proditiæ fuerant, tum Barbaricas, tum Græcanicas vetustates. Vndecim vero sequentibus res vbique locorum gestas, à bello Iliaco ad Magni Alexandri excessum, comprehendebat. Denique tribus, & viginti posterioribus libris descripsit quicquid relatu dignum contigerat vsq; ad initium belli à Romanis aduersus Gallos, suscepti,

fufcepti, quo Caius Iulius Cæſar, cui magnitudo factorum, & ſupra mortalem potentia, Diui nomē peperere, pugnaciſſimis gentibus debellatis, Imperium Latinum ad Britannicas uſq; inſulas proſtatauit. Nunc de tanto opere vix quindecim exſtant libri, paucaq; ex Photio, alijsq; collecta. Et quo maior iactura eſſet, periire ſimul Berofus, Theopompus, Ephorus, Philiftus, Calliſthenes, Timæus, ex quorum lucubrationibus aſſiduo triginta annorum labore Hiftoriam ſuam Diodorus congeſſerat. Hunc Rhodiginus meus fabuloſum ſcriptorem appellat: Cui Viues aſtipulatur, nihil eo fuiſſe nugacius affirmans. Hi verò de Hiftoria ipſa loquuntur; nam de titulo Plinius, cum reprehenderet alios, qui magnificis, atq; ampulloſis inſcriptionibus, propter quæ vadimonium deſeri poſſet, quæq; vellac gallinaceum pollicerentur, inſaniebant, Diodorum autem, qui purè, & ſimpliciter Bibliothecam inſcripſerit; putaret primum inter Græcos deſiſſe nugari. Quod autem Diodorus in Theopompo redarguit, ex libris octo, & quinquaginta, quinque eſſe, quorum dubia ſit fides, id in eum poterit retorqueri, non iniuſta, ut plerique aiunt, recriminatione: Nam ex quadraginta Diodori libris, quinque priores toti penè ex fabulis conflati videntur. Sanè multa ſunt errata Diodori in ſupputatione olympiadum, & Romanorum

norum magistratuum appellatione; quo nomine à Bodino, Sigonio, Pighio, sæpenumero vapulauit. Cæterum ipse se purgat Diodorus, qui priores illos Historiæ suæ libros vocat enarrationes veterū fabularum; neque enim diffitetur prisci temporis Historiam fabulis esse permistam; neq; omnino vera esse, aut credibilia putauit; quæ de Heroicis temporibus memorantur: sed tamen fatius esse duxit quomodocunque res priscas nosse, quàm eas penitus ignorare. Nec certè negare possumus magnam fuisse huius autoris industriam, & studium veritatis, quo incensus longinquas peregrinationes per Asiam, atq; Europam suscepit, nullis periculis ter-ritus, nullisq; laboribus fractus, quo minus loca ipsa lustraret, de quibus scripturus esset. Quā quidem ob diligentiam commendatur in primis non modò ab ethnicis scriptoribus, sed etiam à Iustino Martyre, atq; Eusebio Cæsariense: Qui tamen illud explosione, ac sibilo excipiunt, quod interpretatus est annos fuisse Lunares, cum homines annos mille aliquando viuerent; quasi verò non etiā num longæuus quisque mille mensibus, hoc est octoginta annis, viuat; vt interim transeam quàm liquidò appareat ex libro Geneseos annos illos fuisse Solares. Dictionem Diodori carpit, atq; arrodit Bodinus, qua nihil magis vulgare dici possit; reprehenditq; eos, qui Diodorum Appiano antepo-

nunt,

nunt, cui ne conferendus sit quidem, siue dicendi genus, siue rationem Historiæ spectent. Sed vir multo acrioris iudicij Photius Patriarcha Diodorum ait vsum esse dictione perspicua, nec nimium ornata, sed Historiæ maximè consentanea; neque affectare puram putam Atticam elocutionem, sed neque deijci in vulgarem, & tritam dicendi formã, verum mediocri eloquentia gaudere. Illo quoque nomine laudandus videtur, quod illustrium in doctrinis virorum ætates solus, e veteribus ad Historiam adiunxerit: Quod inter neotericos nimis religiosè obseruauit religiosus vir Iacobus Philippus.

V.

DIONYSIVS ALEXANDRI filius Hali-
carnassensis, quem felici illo Augusti se-
culo floruisse inter omnes conuenit, or-
sus a vetustis Aboriginibus, & priscis Italiæ inco-
lis pertexuit Historiam vsque ad primum bellum
Punicum, eò definens vnde Polybius incep-
erat: Opusq; suum Romanas antiquitates inscrip-
sit; si is titulus proprius sit priorum duntaxat libro-
rum, quos ante cæteros, vt præliminares, atq; isa-
gogicos, cœu promulsidem quandam lecturis præ-
gustandos proposuit. Ex libris viginti, quos à Dio-
nyfio constat fuisse scriptos, vndecim extant, qui-
bus

C

bus peruenit vsq; ad ablatam Decem uiris dominationem, militarium tribunorum potestatem abrogatam, & consulatum Patribus restitutum anno Urbis Conditaë CCCXII. Nec bonus tantum Historicus fuit, sed etiam Rhetor disertus, & Criticus nobilis; quod ostendunt opuscula eius, quæ supersunt, à Theodoro Gaza in latinum conuersa, de characteribus antiquorum oratorum, de compositione orationis, de epithalamijs, epitaphijs, panegyricis rectè conficiendis; quorum gratia cum optimis artis dicendi præceptoribus numeratus est à summo illius artis magistro Quintiliano. Eam illi laudem Scaliger tribuit, quod accuratius, ac, ut ita dicam, religiosius tempora nemo obseruauit; & præcipua quidem est laus hæc in Historia, quæ dicitur esse lux temporum. Liuius quoque in ea parte præfertur, quod plura, quam ille scribat, & diligentius enarret, quæ ad Romanas antiquitates pertinebant. Bodinus multo, & verius, & melius Dionysium scripsisse autumat, quam Fabium, Sallustium, Catonem; eaq; diligentia vsus, ut Græcos omnes, & Latinos superasse videatur: nam quæ Latini, quasi peruulgata, neglexerunt, sacrificia, ludos, triumphos, magistratuum insignia, censum, auspicia, comitia, totiusq; populi difficilem in classes, ac tribus partitionem; Senatus auctoritatem, iussa plebis, magistratuum imperia, populi potestatem,

statem, denique vniuersam Romanorum in guberna-
nda Republica disciplinam vnus omnium accuratissime declarauit : Et quo maior ex eius Historiæ lectione vtilitas caperetur, Græcorum ritus, & mores cum Romanis institutis comparauit. Neque prætermisit leges Romuli, Numæ, Seruij, quæ sine hoc autore nobis interuersæ fuissent : Hæc si-
quidem Latini scriptores, quasi æquè exteris atq; ciuibus nota, ac perpetuò mansura, tacuerunt, quæ Dionysius, Plutarchus, Polybius, Dion, Græci homines, diligenter pertractarunt. Quod si Historia Dionysij integra extaret, nihil esset cur Varonis thesauros quæreremus; huic enim Dionysius, & præterea Pompeio, ac Tuberoni tanta fuit non solum beneuolentia, sed etiam familiaritate coniunctus, vt ab eorum colloquijs præclara omnia hausisse videatur. Laudant in eo peritiores Græci sermonis moderatum dicendi genus, atq; Atticam puritatem; nam stylus Dionysij, quemadmodum loquitur Photius, est καυοπητικὴν gratiam videlicet, ac decoram habens nouitatem; orationis elegantia, per se culta, & suauis, rerum particularium narratione, & quibusdam iucundissimis digressionibus exornatur, quibus dictio quoque leniri poterat, quæ in asperitatem abiisset. Video quibusdam tædio fuisse Dionysij prolixitatem, longasq; in vtranq; partem disceptationes; qua tamē.

in re multo intemperantiùs peccauit Thucydides. Id verò Sebastiano Maccio visum est intolerabile; Dionysium suis armis conuinci, & cæcutire qui factem alijs prætulero, damnasse enim conciones in alijs, ipsum tamen tam obliquas, & mistas, quàm etiam directas frequentare. Sanè quidem explofere quamplurimi Historiographos cõcionabundos, vt à rei veritate aberrantes, fictæ enim sunt pleræque omnes huiuscemodi orationes, ijsq; legendis multum temporis frustra conteritur. Harum verò dissertationum euersores præcipui fuerunt ex recentioribus Franciscus Patritius, & Paulus Benius in Patauina Humanitatis Cathedra Collega meus: Quos tamen oppugnat Vir Græcè, & Latinè doctissimus Lugdunensis Batauorum Gymnasij miraculum, ex cuius vberimis fontibus nostri, qualescunque, riuuli diducuntur, Ioannes Gherardus Vossius, Artis Historicæ sectione vicefima, vbi omnium fermè vtriusque linguæ Historicorum exemplis conciones in Historia retinendas comprobauit: Primùm enim consilia, deinde acta, ac denique euentus, Ciceronis iudicio, narrare oportet: Consilia verò sine concionibus. vix, aut ne vix quidem narrari possunt. Quare huius criminis poena tu quoque, Domine, quasi adiecto Mineruæ calculo, absoluis Dionysium.

TITVS LIVIVS PATAVINVS, lac Mu-
farum, mare tranquillum, anima elo-
quentiæ, eorum, qui nunc supersunt
scriptorum Romanæ Historiæ longè princeps,
lactea quadam vbertate dictionis diuinitus facun-
dus, amans virtutum, osor vitiorum, rectus iudi-
cij, rerum togæ, rerum sagi, & si non ex vsu, neque
experientia, egregiè tamen peritus, ab Vrbe Con-
dita ad Diui Augusti æuum centum, & quadragin-
ta libris diuinas illas lucubrationes perduxit, qua-
rum tamen longè maximam partem, ingenti rei li-
terariæ iactura deperditam, nunquam fortasse in-
uenturi, desideramus; nec tanti operis reliquos ha-
bemus nisi quinque, & triginta libros. Solus hic
mortalium dignus censetur; cuius propè inuicto
calamo populi omnium gentium victoris res gestæ
scriberentur. Neque sanè mirum videri potest sa-
pientissimum Regem Alphonsum Aragoniæ sum-
ma ambitione, & conatu petijssè à Patauinis bra-
chium huius viri, quo præclara illa commentaria
descripsit. Nullius certè libri tam libenter, vt in-
quit Regius, nec tanta cum voluptate lætitantur;
nimirum, quod mellea quadam dicendi suauita-
te exundare videtur; qua vel in quotidiano, & fa-
miliari sermone adeo polluisse vir ille traditur, vt
com-

complures, nobilitate, opibusq; præstantes, tam admirabilis facundiæ fama permoti, ex vltimis Hispaniæ, Galliæq; finibus, quo eum audirent loquentem, Romam se se contulerint: Et, quod est maxime mirandum, quos tantæ Urbis, ac tum præcipue florentis, ac triumphantis, contemplatio ad se antea non traxerat, vnius viri eloquentia perduxit. Quo maior sit eorum inscitia, qui Patauinitatem quandam in Liuiio reprehendunt, quam dispercam si Asinius ipse, tam ridiculæ inuentor calumniæ, quid esset sciebat. Dubitatum quidem semper est ab eruditis, penderq; etiam num inexplicata questio de Liuiana Patauinitate; nonnullis existimantibus delicatum Pollionis Asinij palatum visum sibi fuisse aliquid in Liuiio gustare, quod non vsquequaq; sapèret genium Romani sermonis. Credentibus alijs hoc nomine peregrinitatem orthographiæ fuisse reprehensam; scribebat enim, vt ex lapidibus antiquis colligitur, *sibe*, & *quase*, pro *sibi*, & *quasi*. Quod primus, nisi fallor, obseruauit Laurentius Pignorius, alter Patauinorum Liuius, originum patriæ, atque adeo totius vetustatis solertissimus indagator. Contendentibus alijs eam Patauinitatē nihil aliud esse, quàm iterationem simul plurium in eisdem periodis verborum. Quibusdam volentibus studium partium Pompeianarum illam esse Patauinitatem ab Asinio notatam. Denique

nique non paucis suspicantibus patriæ suæ, suorumq; ciuium laudes, parte operis iam deperdita, effusè amplificatas, hac voce cenferi. Senecæ Liuius creditus est fuisse ingenij magni magis, quàm boni. Bodinus accusat in Liuiio dicendi varietatem, interdum enim valdè copiosus est, interdum verò concisus; contra quàm fecit Polybius, sibi semper æqualis. Caius autem Caligula Maronis, & Liuij scripta, ac imagines, teste Suetonio, minimum abfuit quin ex omnibus bibliothecis amouerit, caussatus alterum nullius ingenij, doctrinæq; perexiguæ, alterum verbositatis, & negligentiae. Cæsar quoque Antoninus in suo illo pseudohæporico exprobrat Liuiio malam fidem, quod Thufcorum clarissimis rebus gestis inuiderit. Denique Glareanus Liuium bellicosæ Gallorum gentis egregia facinora odiosè tractare, virtutesq; illorum malignè eleuare conqueritur. Quibus aperte reclamat verendæ autoritatis, & acris iudicij vir Cornelius Tacitus, cui Titus Liuius eloquentiæ, ac fidei præclarus in primis habetur. Sed nemo de hoc melius iudicauit quàm Fabius Quintilianus, cuius illa sunt: Non indignetur sibi Herodotus æquari Titum Liuium, cum in narrando miræ iucunditatis, clarissimiq; candoris, tum in concionibus supra quàm enarrari potest eloquentem; ita dicuntur omnia cum rebus, tum personis accommodata:

ta:

ta: Sed affectus quidem, præcipuè eos, qui sunt dulciores; nemo Historicorum commendauit magis. Plinius præfatione operis Liuium autorem celebrè vocat. Seneca, sibi parum constans, disertissimum appellauit, tantæq; probitatis, vt liqueat eum sensisse, quæ scripsit. Marcus autem Annæus Rhetor asseruit illum fuisse natura candidissimum omnium magnorum ingeniorum æstimatorem. Philippus Comminæus Liuium existimauit esse Latinorum Polybium, omnibusq; senatoribus, & rerum publicarum gubernatoribus perlegendum. Isaacus Casaubonus ad Liuium trāstulit illud Senecæ Rhetoris de Oratorum principe encomium, Populum Romanum huius vnus ingenium par imperio suo habuisse. Et quidem certè adeo visus est nonnullis cum Cicerone conferendus, vt non dubitauerint affirmare; Ciceronem ipsum, si ad scriptionem historiæ totam illam vim forensis facundiæ conuertisset, futurum fuisse Liuium nostro aliquanto inferiorem.

V I I.



MARCVS VALERIVS MAXIMVS, est à nobis diligenter excussus Satyris nostris Epistolaribus, cum ad Ioannē Mariam Vantum de eo referremus, & plurimam anistoreliam, multosque anachronismos in eoprehendimus: Quos quidem errores
figil-

figillatim hic recensere aut omnino superuacaneū
esset, aut certè ab instituto propositæ breuitatis a-
lienum. Dictio parum Latina, aut saltem non sa-
tis pura, & ab illo, quo floruit æuo intempestiue
degenerans. Quāquam neq; bonis illis tempori-
bus omnes æquè benè ac tersè locutos probabile
est, præsertim Cicerone testante, receptis in Ciui-
tatem tot exteris barbarisq; nationibus, infusari
cæpisse natiuum illum candorem sermonis Roma-
ni. Neque in hoc sanè autore inueniri facile pote-
rit aut armonia Liuianæ facundiæ, aut grauitas
Sallustianæ maiestatis, aut vis Cæsarianæ effica-
catis, aut sincera Taciti fides, animosa libertas, &
ciuilis prudentia. Sed pro hisce virtutibus interci-
sa, obscuraq; breuitas, tragicæ exclamationes, affe-
ctata vehementia, seruile ingenium, adulatorio tam
profligata, vt in superstitionem, atq; idololatriam
sæpenumero erumpat. *Gnomas*, quas Græci vo-
cant nimis curiosè perquirunt, ea religione, vt nun-
quam sine sententiola claudat exemplum. Primus
in Historiam poeticum inuocandi morem inuexit,
quem postea secuti sunt Græculi, ad assentationē
natura potius creati, quàm arte compositi. Et cer-
tè poetico magis, quàm Historico fuit Valerius in-
genio; multoq; vtilior videtur eius lectio futura,
epigrammata modulantibus, quàm res gestas scri-
bentibus; est enim acutus, & multo sale respersus;

D pressus

pressus idem, & confertus; vt propterea valdè sit illis proficiuus, qui compendia temporis quærunt, quiq; multis occupationibus distracti breuia quedam momenta, & subcisiuas horas lectioni dare vix possunt: multa enim paucis verbis complectitur, & pulcherrimum medijs fidijs ex immensis Historiæ Romanæ viridarijs florilegium decerpsit: quamquam ne illud quidem vndecunque perfectum; multa siquidem negligenter omisit animaduersione dignissima, quorum notitia multum sanè posteris erat profutura.

VELLEIVS PATERCVLVS, siue ille Marcus, siue Publius, siue Caius nomine censetur, persimilis est ingenio Valerij, nam vterque ad suorum Principum assentationem affabrè facti, reliquos omnes longo interuallo sibi inferiores excelluerunt. In eodem planè ludo videntur docti, & Dominis suis supparasitari potius, quàm Historias scribere. At Velleius, qui, præter liberalem educationem, magistratus, & honores maximos domi, ac militiæ gessit, multo est facundior, & in ipsa rerum gestarum narratione porrectior, atq; iucundior; eius enim elocutio planè Romana, atq; elegans, qua nihil purius, & suauius, si

Bodini auribus vtimur, fluere potest, miram affert legentibus voluptatem. Quædam etiam habet Velleius, quæ haud alibi inuenias: nam Romanas antiquitates ab ultimo principio tanta breuitate, ac perspicuitate comprehendit, ut nemini secundus esse videatur. Laudes etiam illustrium virorum egregia quadam oratione, & magno viro digna commendare solet. Inuidit tamen damnosa veritas huius auctoris gloriæ, nostræque utilitati, magna enim pars desideratur eius Historiæ, quam ipse floridam hercè atque amœnam consarcinauerat. Id verò non prorsus laudauerim quòd non pauca, inseruerit, quæ ab instituto suo videbantur aliena. Præter duos libros Historiæ Velleianæ, quos imperfectos habemus, fragmentum eiusdem auctoris attulit primus Conradus Abbas Urspergensis, quauis Volfangus Lazius illud se recens inuenisse gloriatur. Quo quidem fragmento cladem exercitus Romani in Norico ab immani barbarorum multitudine acceptam commemorat, & legionis diuinæ eam ad vnum internecionem, ut ne nuntius quidē tantæ stragis superfuerit, præter Caium Verrem, Tribunum militum, qui solus, amne transmissus, in proximis paludibus se se occultans, honestam mortem subterfugit; nec multo post Siciliæ Proconsul immani avaritia turpem mortem promeruit, eos, atque ignarium Tullianæ vehementiæ. Sed frag-

mentum hoc, vti fictitium, atq; adulterinum, Vell-
ferus, & Vossius explodunt.

I X.



CAIVS PLINIVS SECVNDVS iure opti-
mo inter Historicos recēsendus videtur,
non tam ob admirandum illud opus Hi-
storiæ Naturalis, quàm ob Romanas Historias,
quas, Plinio Cæcilio teste, religiosissimè scripsit.
Quòd si testem domesticum suspectiorē habemus,
Tranquillum Suetonium audiamus, qui bella om-
nia, quæ vnquam cum Germanis gesta sunt, vigin-
ti voluminibus eum comprehendisse confirmat.
Vir fuit solidæ doctrinæ, multiugæ eruditionis,
ingenij rerum omnium capacis, memoriæ supra-
miraculum grandis, infinitæ lectionis, & scriptio-
nis: Nam, vt ait Cæcilius, nihil ferè legit, quod nō
excerperet, nihil ferè excerptit, quod non digere-
ret: Tam assiduū, pertinacisq; studij, vt vel in bali-
neo, dum destingeretur, audiret aliquid, aut di-
ctaret. In itinere, quasi solutus cæteris curis, huic
vni vacabat, vt meditaretur, atq; componeret. Igi-
tur ad latus eius notarius cum libro, & pugillari-
bus semper hærebat: Sella plerunque vehebatur,
interim legens, ne, spatium eundo, studium tan-
tis per remitteret. Quamobrem nepotem suum
aliquando valetudinis gratia conspicatus deambu-
lantem;

lantem; Poteras, inquit, has horas non perdere :
Nam perire omne tempus arbitrabatur, quod stu-
dijs non impenderetur . Quis igitur ex istis, qui to-
ta vita literis assident, chartisq; impallefcunt, col-
latus huic viro, non, quasi somno, & inertia dedi-
tus, erubescat ? Erat illi, inquit idem Cæcilius,
acre ingenium, incredibile studium, summa vigi-
lantia. Quibus artibus effecit, vt paucis admodum
vitæ annis tam multa scripserit, vt plura his ne tri-
seclisenex ille Nestor cōgesturus fuisse videatur; es-
se enim desijt sexto, & quinquagesimo ætatis anno,
quo Caius quoque Cæsar, Thomas, & Bonauétura,
Theosophorum apices, Fabius Bonifacius, auus
meus, optimus Iurisconsultus, bonus coniector,
nec poeta malus, ac tempestate nostra Tassus, &
Marinus, Italicæ poeseos sine controuersia princi-
pes, obiere . Plinio, tanto viro, oblatrarunt cani-
culæ quædam, à quibus fasciculariam facere insi-
mulatur, pleraq; ad verbum exscribere, nihil de
suo adijcere, cuncta olfacere, nihil degustare, om-
nia deglutire, nihil decoquere, sibi ipsi dissidere, ve-
teres iniuria reprehendere, magorum superstitioni-
bus esse inquinatum, mendaciorum gazophyla-
ciuto, rerum naturæ imperitum, medicinæ igna-
rum, denique Hydram fallaciarum, & Oceanum .
errorum appellant : Imò etiam benè grande volu-
men scripsit in eum Nicolaus Leonicens; nec eru-
buit

buit viri reuerentia, nec timuit illius tituli inuidiam: *De erroribus Plinij*. Si tamen se Plinianæ gloriæ luminibus obstruxisse tenebriones isti arbitrantur, nã illi vehementer errant, aut delirant potius; nam Historiæ Naturalis opus diffusum, & nõ minus fortasse varium, quàm ipsa Natura, perennabit cum ipsa Natura, idemq; vtriusque erit interitus. Densus, & strictus, & succi plenus est Plinius nihilo minus quàm Seneca, ideoq; curtus, atq; succisus; vt de vtroque videatur dici rectè posse, quod de altero dictum est, calcem esse absq; arena, aut parietem potius absq; cæmento; plures enim in vtroque sunt propè sententiæ, quàm verba, multaq; simul effata singuli versùs comprehendunt. Plinium Gellius affirmat ingenij, dignitatisq; gratia temporibus suis autoritate magna fuisse præditum, ætatisq; suæ doctissimum appellatum. Budæus autorem rerum omnium memorabilium, æstimatorẽ acutum, & admiratorem disertum: Alij iudicem ingeniorum summum, literarumq; antistitem appellarunt. Illud autem Eusebij de Plinio iudicium apud Macrobiũ, genus dicendi pingue, & floridũ putantis, in quo Plinius Secundus quondam, & nunc nullo veterum minor Symmachus luxuriatur, vtrum iuniori Plinio, quàm seniori magis aptetur, viderint eruditi. Ego interim neutri conuenire statuerem, nec putarem melius alterutri

terutri posse accommodari, quam iugum equis,
aut bobus ephippia.

X.



PLUTARCHVS, natione Bœotus, Patria
Chæronensis, sacerdos Apollinis, vixit
sub Vespasiano, Tito, Domitiano, ac
Nerua, sed præcipuè floruit sub Traiano, à quo nō
solum est missus in Istriam præfectus, sed Consula-
ri etiam dignitate est ornatus; cuius quidem non-
dum Cæsaris, sed clarissimi tum quoq; adolescen-
tis, magister fuit. Vir, vt ait Vossius, vndecunque
doctissimus, idem Philologus, Philosophus; & Hi-
storicus summus; exactam enim, altamque trium
harum disciplinarum peritiam scripta eius vndi-
que spirant. Himerius apud Photium oratorem
etiam, & quidem disertissimum vocat. Par ferè est
Plutarchus Dionysio in Romana antiquitate dili-
genter tradenda, eruenda, scrutanda, enucleanda.
Miramur in eo liberum de re quaque iudiciū, vt
non tam Historicus, quàm censor Principum vi-
deatur. Ita enim sentit Bodinus, siquis idoneus est
ciuiliū, & militarium rerum arbiter, aut Plutar-
chum esse, aut neminem: Quid enim hunc virum
latere potuit, qui ad summum sapientiæ studium,
rerum quoque gerendarum vsum adiunxerit? Bel-
lorum

lorum causas, initia, progressus, offensiones, victorias, non aliter ac bonus imperator, ad amissim exponit; & se maximè intelligere ostendit quæcunque alijs intelligenda exhibebat. Illud tamen censoria dignum est nota, quòd Græcos quidem cum Græcis, Romanosq; inter se bona fide comparauit, Græcos verò cum Romanis non item. Idque facile intelligi potest ex comparatione Agésilai cū Pompeio, Demosthenis cum Cicerone, Aristidis cum Portio, Pelopidæ cum Marcello. Interdum etiam in Romanorum antiquitate explicanda labitur; quod in homine Græco, qui se linguam Latinam non satis callere in vita Demosthenis confitetur, mirum videri non debet. Male quoque denario drachmam, libræ minam æquauit in vita Fabij, & Antonij; id quod Budæo magnam præbuit errandi occasionem; nam his quasi fundamentis malè iactis plurima ædificij moles superimposita collabescit. Neque verò possum dissimulare dictionem Plutarchi, grauem quidem esse, sed duriusculam videri. Cæterum leuem hunc defectum multiplici adeo scientia summus vir supplet, vt nihil nobis, quod amplius desideraremus fecisse reliqui videatur. Complura scripsit, & omnia quidem sesamo, ac papauerè condita, aut respersa, quibus vix quicquam sit, vel ad legendum suauius, vel ad intelligendum subtilius, vel ad noscendum iucundius;

vel

vel ad discendum vtilius. Ipse enim, veluti gladius quidam Delphicus, pluribus simul vñibus est accommodatus, vnus instar omnium scriptorum. Quippe ex eius libris, tanquam ex vberissimo, omniumq; bonorum refertissimo penore, aut Copiæ cornu, pulcherrima quæq; & scitu dignissima licet depromere. Hic, præter ethica opuscula, & physica, & historica, scripsit etiam lectissimorum vitas, tum ex Græcis, tum ex Latinis, qui armis, aut literis enituerunt; aliaq; multa, quæ, magno reipublicæ literariæ detrimento amissa, desiderantur; quorum nonnulla ipse citat, non pauca à Gellio, Philopono, & alijs proferuntur. Indicem autem paternarum lucubrationum Lamprias Plutarchi filius texerat, qui pariter periit, vt ne argumenta quidē adinventionū fœcundissimi ingenij potuerint ad nos peruenire. Editus tamen est non ita multo ante catalogus operum Plutarchi, quæ perierunt; qui vtrum sit germanus ille, quem Lamprias confecerat, critici viderint. Bœotæ olim malè audiebant ab inscitia, vel potius stoliditate; vt quencunque maximè brutum, atq; indocilem, Bœotum in crasso iurarent aere natum, vt ait Flaccus, & suem Bœoticam, pro homine crasso, ac rudi, prouerbialiter vsurparent. Cæterum cœleste illud Plutarchi ingenium, & mens e puro æthere constans, popularium suorum maculam diluit. Sugillant quidam

E Plu-

Plutarchum, vt liuidum, quippe qui in Herodotū nimis hostiliter genuinum fregerit, quiq; in celebrandis illustrium virorum virtutibus, Græcis suis nimium faueat. Nec desunt, qui sinceritatem in Historia desiderent, cū ille interdum à reliquis dissentiat, vt maxime ex Coriolano videre est, si cū Liuiο conferatur. Nonnullis etiam displicuit vana eruditionis ostentatio, qua vitas suas fecit interpoles, dum philosophica quædam minus necessaria, poetarumq; dicta, & veterum sententias identidem intermiscet; vt propterea dictus fuerit ambitiosus ab Asulano. Verū enim verò non est adeo compescenda scriptorum libertas, & quibusdam veluti pedicis adstringenda, vt nullę omninò egressiones magnis ingenijs sint indulgendæ. Illud certè constat, Plutarchum grauis fuisse autoritatis, atque inter Græcos doctissimum fuisse à Gellio vocatum: Eruditissimum quoque, & prudentissimum fuisse appellatum à Rhodigino meo, viro cum primis in iudicandis, atque excutiendis autoribus versatissimo.

X I.



CAIUS CORNELIVS TACITVS, vt politicis omnibus amicissimus, ita lationibus est quibusdam inuisus, quòd de generis humani assertore CHRISTO impiè loquatur, quodq; Martýribus insultans, eorum sanctissi-

atissimam religionem vocet exitiabilem superstitionem; odioq; humanarum gentium conuictos, quæsitissimis pœnis meritò affectos putet; gratuleturq; pereuntibus addita ludibria, vt ferarum tergis coniecti, laniatu canum interirent, atque, vbi defecisset dies, pice, & resina perfusi, in vsum nocturni luminis vrerentur. Quodq; Mosis miracula, & ritus, & cæremonias irrideat; profanaq; omnia fuisse Iudæis astruat, quæ Romanis sacra, rursum concessa illis, quæ Romanis incesta: Quodq; illum aut credere, aut scribere non pudeat Iudæos asini agrestis effigiem, quo monstrante errorem sitimq; depulerant, penetrati sacrasse. Quò videtur etiam respexisse Iuuenalis, cum diceret, quosdam, metuentem Sabbathæ patrem sortitos, nihil adorare præter nubes, & Cylli numen; ita enim Cylli, non Cœli legendum puto. Quem verò non mise-reat Claudij Verderij, qui, cum se autorum penè omnium censorem profiteatur, eam, quam modò ex Tacito historiam retulimus, per inscitiam linguæ perperam intelligendo, Tacitum affirmari scriptis consignasse asininum caput à Christianis coli? Huius factionis hominibus Budæus videtur assensus, cum omnium scriptorum sceleratissimū Tacitum appellaret, quem Tertullianus mendacē, Orosius adulatorē vocauerant. Adjiciunt calumniatores hunc esse Latinum Xenophontem crude-

lis, ac detestabilis cuiusdam Tiberi-pædiæ, quæ Principes ad tyrannidem non quidem perfunctoriè, sed accuratè instruuntur. Eundem, cùm multis seculis delituisse, fuisse e tenebris erutum pestifera nescio cuius Germani curiositate, vniuerso terrarum orbi forsitan damnosiore alius Germani execrabili industria, quæ fulmen illud bellicū adinuenit, cui bombardę e re nomen est inditum. Quod autem ad stylum spectat, Tacitus adeo non placuit Alciato, vt non dubitarit asserere dictionem eius esse senticeta. Sed enim Taciti obtrectatores non fuerunt impedimento quo minus ille tanti fuerit apud M. Claudium Tacitum Imperatorem, vt imaginem illius in omnibus collocaret bibliothecis, librosq; eius decies quot annis describi, ac in tablinis publicis collocari præciperet. Cosmus autem Mediceus, vir reipublicæ scientissimus, omnibusq; imperatorijs artibus instructissimus, non alium Historicum æquè lectitabat. Vt nihil interim dicā de his, quos hac tempestate orbis terrarum gubernaculis fortuna præfecit, qui Tacitum in delicijs habendum, ad verbum ediscendum, & singula eius verba singula testimonia putant. Hunc Heroica vestra, Veneti Proceres, Dijs proxima, sapientia, vocat signiferum criticæ Historiæ, parentem humanæ prudentiæ, politicorum magistrum, coryphæum scriptorum quicumque ad illud gloriæ fastigium

stigma peruenere, vt in eorum lucubrationibus plura sint prope documenta, quàm versus, & plures penè sententiæ, quàm verba. Huius, tanquam e tripode, dicta accipiuntur, huius effata, vt oracula, excipiuntur, huius monita, vt è cœlo missa, adorantur; cùm præterita, quod est Historici, ita commemoret, vt futura, quod est sapientis, præuideat, præmōstret, excutiat. Verè igitur ab Heinio dictum putamus, apud Tacitū occultam quandam, & mysticam fuisse haruspicinam, qua non animantium exta scrutaretur, sed Regum corda, mentesq; introspiceret: Huiusq; scripta meram esse prudentiæ medullam, illius sacrum os linguam Suadæ, labellumq; Pithus habuisse; denique Tacitum ocellum prouidentię, corculum sapientiæ meritò nominandum. In Romanorum autem antiquitatibus explicandis magnum Tacitus nobis attulit adiumentum, cum enim à Tiberio vsque ad Neruam vnius seculi res gestas conscripserit, omnia, tum magna, tum minima, studiosè prosequitur; quippe non fusos tantum exercitus, expugnatasq; vrbes, & certamina plebis cum optimatibus, sed proscriptiones ciuium, & delatorum insidias, & suspectam Principibus priuatorum potentiam, & perniciem innocentium, & callidæ tyrannidis, secretiora mysterijs Eleusinis, arcana eruit, prodit, explicat diligentia, ac iudicio propè incredibili.

Ne-

Neque post Aduicā victoriam vllus apparuit Historicus, qui militarem, aut forensem rationem copiosius tractarit. Floruit enim diutissimè armorū gloria, vrbanaq; disciplina, & Proconsul Germaniam inferiorem obtinuit: Quo tempore Germanorum mores, instituta, ac ritus tanta diligentia perscripsit, vt vni Tacito suam antiquitatem Germani acceptam ferant. Est autem, vt sentit Bodinus, oratio Taciti mirum in modū arguta, & multo sale respersa; neque vllus profectò Historicus magistratui, ac iudici vtilior videtur. Diçtio quidem eius florentior, vberiorq; in Historiarum est libris; pressior verò, vt par erat, sicciorq; in Annalibus; grauis tamen vtroque, & diserta: Quem propterea Plinius Cæcilius eloquentissimum, atq; immortalitatis datorem vocat: Orosius, quāuis huic alio nomine infensus, Historiæ scriptorem diligentissimum: Vopiscus inter facundissimos cooptat: Spartianus emendatissimum; & candidissimum scriptorem appellat: Sidonius nulli ori tacendum, & nunquam sine laude commemorandum. Casaubonus, magni & acerrimi virum ingenij, nouæ cuiusdam, grauis, concisæ, & sententiosæ eloquentiæ genere eximiè præditum: quique, nisi fortuna tēporum dignam ei tanta facultate materiam negauisset quenuis e principibus Historicorum videatur potuisse prouocare.

X I I.

FULVIUS FRONTINVS stratagemata, per Romanorum Historiam diffusa, di-
 ctione facili, atq; ordinatissima tempo-
 rum serie digessit. Cuius exemplo nos quoq; cum
 adhuc inter adolescentes numeraremur, amatoria
 stratagemata vndique excerpimus; ab hoc enim
 titulo res amatoria non abhorret, nam, vt ait Na-
 so, *Militat omnis amans, & habet sua castra Cupido.*
 Cæterum huiuscemodi nugamēta, iuuenilia pror-
 sus, & ludicra, statim atq; ex ephebis excessimus,
 omninò suppressenda putauimus: Hæc enim ætas,
 iam matura, & virilis, alios mores postulat, vt est
 apud Comicum. Videtur aliquando Frontinus nō
 satis elegans, & nonnunquam parū Latinus fuisse,
 si delicatiorū quorūdam aures consulamus. Discre-
 pat etiam interdū ab alijs scriptoribus in rerum ge-
 starū narratione dubiū errore, an consilio. Cōmen-
 tariolum quoque de Aquis Urbis, quem nobis ætas
 inuidit, Frontinus conscripsit, præter hos quatuor
 militaris solertiæ libros, quos etiā num legimus: Ex
 quibus sanè plurimū frugis percipere possunt exer-
 cituum ductores, quos ille acuit cum ad insidias pa-
 randas, tum ad eas euitandas. Huic etiam auctori
 debemus nonnullorum militarium vocabulorum
 explicationes, quas absq; illo eramus ignoraturi.

Iulium

Iulium quoque obsequentem putamus ex Frontini imitatione prodigia, quæcunque sparsim habebantur, in vnum collegisse, elocutione verè candida, & defæcata, & cuius antiquorum exæquanda. librum eius habemus mutilum; incipit enim anno ab Vrbe Condita quingentesimo quinto, desinit Paulo Fabio, Quinto Ælio Consulibus. Quicquid tamen reliquiarum ex hoc autore temporis iniuria non deleuit, charum doctis esse oportet; præsertim si nobis aliquando præbuerit legendas quas fecit in hunc autorem obseruationes Vir, de omni antiquitate optimè meritus, ac inter polyhistoras, & polygraphos iurè numerandus, Laurentius Pignorius. Qui ne diutius spem nostram suspendat, tibi, DOMINE, cogendus est formula ad exhibendum.

X I I I.



CAIVS PLINIVS CÆCILIVS, Vir summus, & dignus, quem sibi, vt Homerum olim septem Græciæ Vrbes, duæ clarissimæ italiæ Ciuitates, Verona, Nouumq; Comum certatim vindicent. Qua de re & ingentia condita, atq; edita sunt volumina; & nos ipsi ad Ioannem Baptistam Baiacham, Virum integritate, & doctrina spectatissimum, scribentes, disceptauimus. Hūc Historicorum albo expungunt nōnulli, qui librum
de

de Viris Illustribus illi abiudicant. Nam Hermolaus Barbarus censuit Cornelij Nepotis esse: Lilius Gyraldus Suetonio tribuit: Alij Tacito: Recentiores Aurelio Victori. Ego vindicias secundum Plinium decerno; fretus tum omnium antiquorum codicum epigrapha, meiꝫ; præsertim, in membranis perquam diligenter exscripti, testimonio; cuius inscriptio est huiusmodi: *C. Plinij Secundi Oratoris Veronensis De Viris Illustribus liber.* tum etiam Aldi Manutij, Ioannis Iocundi, Baptistæ Egnatij, plurimorumꝫ; eruditorum autoritatibus: Præter quàm quòd tota illius libri phrasis, & dicendi character cum reliquis Plinij scriptis mirifice cõgruit. Fuit quidem Plinius Orator potius, quàm Historicus, vt sæpissimè in epistolis suis de se ipse testatur: Eum tamen ad Historiam conscribendam animũ etiam adiecisse constat ex his, quæ ipse ad Capitonem scripsit, cum peteret ab amico sibi, iam ad Historiam conficiendam parato, præsterni materiam. Fuit hic Vir profectò secundũ Ciceronem eloquentissimus: Nec mirum id certè si se totam illi traderit eloquentia, qui Plinium auunculum, Quintilianum præceptorem habuerit. Illud autem demiror quomodo in mentem venerit Carolo Sigonio tam imprudenter effari Plinium hunc elegantia: Romana haud mirabilem esse; cum ita in contrariam sententiam docti omnes transferint, vt eius

F epi-

epistolis neque magis elaboratum quicquam, neque
 tersius, neque in eo genere acutius esse pronun-
 tiant. Ex quarum quidem lectione, præter nu-
 merum, & collocationem, & candorem latinæ,
 & sententiarum gravitatem, atque prudentiam,
 multa licet haurire ad Romanorum antiquitates,
 & mores, & ritus intelligendos. At eius panegy-
 rico nihil est neque ad eloquentiam comparandam,
 neque ad rempub. rectè administrandam conduci-
 bilius. Quare, ut Africanus Xenophontis Cyropæ-
 diam de manibus ponere non solebat, quia nullum
 esset in ea moderati imperij prætermisum officiū:
 sic Principes nostri panegyricum Plinij debent as-
 siduè perlegere, ut optimi viri, fortissimi impera-
 toris, iustissimi Regis exemplo tales, & ipsi efficiantur,
 qualis à Plinio Traianus describitur: Qui qui-
 dem ipso Cyro eo maior fuit, quod ille Persa non
 ad Historiæ fidem formatus, sed ad prototypon ius-
 ti imperij, quemadmodum suspicatus est Cicero,
 videtur confectus: Traianus autè re vera talis fuit,
 qualem eum nobis Plinius efformat. Ut propterea
 probabilis coniectura videatur quorundam sacræ
 rei peritorum, qui eum inter Cœlites verè fuisse
 receptum censuerunt: Quorum opinionem non
 mediocriter iuuat Methildis oraculum: Huic enim
 Virgini roganti CHRISTVS aliquando respondi-
 se fertur, Velle se homines latere quid de Salomo-
 ne,

ne, Sampſone, Origene, ac Traiano ſtatuerit Diuina pietas, clementia, benignitas, liberalitas, ne illi aut in volutabro Venèris perpetuo ſordeſceret, aut ſe de inimicis vlcifcerentur, aut humanis doctrinis nimium confiderent, aut Chriſtianam religionem, & baptiſmum negligerent. Sed vt ab hoc quaſi diuerticulo ad Plinium reuertamur, ille annulo ſignatorio quadrigam inſculpiſit, puto ad ſignificandam celeritatem, quæ perferendis literis eſt adhibenda. Quemadmodum fertur Auguſtus Sphyngris nota literas obſignaffe, vt innueret occulta, & ſecreta eſſe oportere literarum arcana. Contra quàm cenſuit Mecœnas, qui ranam pro ſigillo adhibuit, vt ſignificaret quicquid ſcriptis mæ datum eſſet, ſtatim manare in vulgus, & publicum fieri. Porro Plinianæ in ſcribendo elegantix duplicem cauſam inuenio; alteram quod floruit Veſpaſianorum ſeculo, quo ſecundum Auguſtæum, politius, & purgatius nullum Romæ fuit; alterâ quod vt nullam ſcribendi diligentiam, ſic nullum emendandi genus omiſit. Nam primùm quæ compoſuerat, ſecum ipſe recognoſcebat; mox interioribus aliquot amicis recensenda tradebat; tum paucis quibuſdam, ſelectisq; viris legebat; deniq; pluribus recitabat. Quã ſi animi attentionem Plinius ſeniori adhibuiſſet, & nos ſcripta eius purgatiora legeremus, & ipſe criticorû verberationem declinaſſet.



AIVS SVETONIVS TRANQVILLVS

Adriano ab epistolis fuit ; ex eoq; dignitatis loco deiectus, quòd cum Imperatoris vxore familiarius egisse ferebatur, quàm decus Aulicæ consuetudinis postularet, in suas se literas abdidit; multaq; scripsit, quæ iniuria temporis intercidere, quorum lemmata recensuerunt Suidas, Gellius, Aufonius, Tzetzes, Seruius, Priscianus; vitas in primis Grammaticorum, Rhetorum, Poetarum, Cæsarum. Atque de horum vita duodecim libri foliad nos integri peruenerunt. Primum tamen librum quidam grāmatici acephalon putant; non enim verisimile esse illum Cæsaris incunabula tacuisse, qui cæterorum omnium, etiam minus illustrium, altius originem repetiuerit. Scripsit præterea Ludicæ Historiæ libros, qui toti nobis perierunt: Quos ego denuò scribere orsus, vtinam meliore fato victuros absoluam. Doctus vir, & sincerus nominatur Suetonius ab Aulo Gellio; emendatissimus, & candidissimus à Vopisco, atq; is, cui familiare sit amare breuitatem: Purgatissimum vocat Alexander Alexandræus, nunquàm inconsideratè locutū, nec plusquam oporteat scribendo addidisse, ac tam circumcisum explicandis, adnotandisq; rebus, vt arguta breuitate pleraque potius per-

perstrinxisse, quàm aliquid plus iusto addidisse videatur. Ludouico Viues idem est Græcorum, & Latinorum diligentissimus, atq; incorruptissimus. Plinio iuniori probatissimus, honestissimus, eruditissimus: Cuius etiam viri iudicio credibile est persuasum esse Tranquillo vt sua scripta ederet. Testatur enim Plinius eius opus, qualecunque illud tandem fuerit, perfectum, absolutumq; esse, nec iã splendescere lima, sed atteri. Qui Suetonij vitam conscripsit, siue ille Sicco Polentanus, siue alius quispiam, duodecim Cæsarum vitas valdè probandas existimat, graphicèq; conscriptas; in quo styli genere primas, inquit, confessione eruditorum, haud dubiè occupauit: Æqui enim rerum æstimator, vt ait Bodinus, nihil vnquam accuratius ab vlllo Historico scriptum fatentur. Opus est emunctum, refertumq; eruditione haud quaquam triuiali, & compositissimo ordine distinctum, oppidè quàm tersum, & limpidissima scriptione detersum. Est etiam in illo opere plurima imago Romanæ vetustatis, multæ leges, edicta, senatus consulta, nusquam alibi forsitan inuenienda: Quæ verò, qualisq; fuerit Principum cognitio, ac iurisdictio solus penè Tranquillus cum Tacito scribit. Vt de hoc autore dicere aliquis possit quod de se ipso Zeuxis non est veritus augurari, inuisurum aliquem facilius, quàm imitaturum. Nec dubito quin multi

Prin-

Principes malint Suetonij calamo vel damnari, quàm nonnullorù assentatiunculis palpari. Quem admodum patritius ille Florentinus, cuius nomē, vt sic cum Herodoto dicam, etiam si sciam, tamen spontè obliuiscor, malebat censerī inter Inferos apud Danthem, quàm inter Cælicolas apud Claraaccæum. At non placet quibusdam, quòd de Christianis parum piè sentiat; quod fœdissimas quasque Principum libidines nimis studiosè confectatur; quòd leuissima quæque, & viro graui contemptibilia prosequitur. Sed profectò in Principū dictis, & factis nihil paruum, aut despicabile videri debet; propterea quod in vulgus dimanant, & Principis exemplo mores populi plerunque reguntur. Et rectè mihi sensisse videtur Damis Assyrius, apud Philostratum: Cum enim sibi à viro quodam elegantiore obijci intellexisset, quod in Apollonij vita scribenda quisquiliis etiam colligeret, catellos imitatus, qui cenantibus dominis analecta, micaeque excipiunt: Respondit, In conuiuio Deorum eam curam famulis circumstantibus esse oportere, ne qua, etiam minima, ambrosiæ particula, si fortè deciderit, pereat.

X V.



APPIANVS SOPHISTA ALEXANDRI-
 NVS enituit sub Traiano, Adriano, An-
 tonino Pio; caularumq; fuit patronus
 tantisper donec Cæſaris procuratoribus adlegere-
 tur. Romanam Hiſtoriam ab Illo capto ad impe-
 rium Auguſti quatuor & viginti voluminibus latè
 deſcripſit; aut certè duobus & viginti; ſic enim Ca-
 rolo Stephano, & Volaterrano, & Sigonio placuit.
 Sed hoc etiam ex opere longè optimam partè dies
 circuncidit; neque iam quicquam reliquiarū tam
 vultu molis habemus, præter Punica, Syriaca, Par-
 thica, Mithridatica, Iberica, Annibalica, Ilyrica,
 & Ciuilia, cum exiguo Celticorum ſpecimine, aut
 fragmento. Agebatur autem Urbis Conditæ an-
 nus nongentefimus, cum ea ſcriberentur ab Appia-
 no. Cuius ſtylum ieiunū, ac tenuem vocauit Pho-
 tius. Scaliger quoque putat Appianum fuiſſe in
 Hiſtoria admodum infantem, cumq; alienorum la-
 borum fucum, merito appellat: nam pleraq; ex Po-
 lybio, Plutarcho, cæterisque, ſe antiquioribus tan-
 tum non ad verbum exſcribit, vt alij quoq; viri do-
 cti obſeruarunt. Procliuiſ eſt in aſſentationem, &
 Romanæ potentie plus interdum fauet, quam bar-
 barorū ferat inuidia: nec ſuccenſet fortunæ, quod
 patriam ſuam Romanis ſubiecerit: parumq; abeſt
 quin,

quin, & ipse cum Aristide dicat, præclare egisse Alexandrum, qui, quod solum tanta indole dignū opus reliquit, Urbem sui nominis in Ægypto Romanis extruxerit; vt illi, post suam, Occidentis dominam, altera quodammodo Roma, & quidem florentissima in Oriente potirentur. Illud tamen nemo putet Romanis non magis probro, quàm decori fuisse, vt mutuas vxores amicis darent, quemadmodum dixit Appianus: Et confirmarat olim Plutarchus exemplo Catonis, qui Martiam suam Hortensio commodauit, ad prolem videlicet ex ea suscipiendam. Sed neutri illorum id assentitur Bodinus, mentitos fuisse arbitratus. Credamus id potius Parthis, ac Lacedæmonijs vsitatum, quemadmodum memoriæ prodidit Strabo. Candidus, Appianum parum candidè interpretatus, laudat in eorum magnitudinem, eorum, qui gessere, gloriam & famam, Historiæ varietatem, orationum copiam, citra eloquentiæ lenocinium. Commendat verò præcipuè energiam, atq; euidentiā; ait enim, dū legit Appianum, se non audire Romanorum facta, sed intelligere, neq; intelligere tantum, sed interesse. Quanquam & ipse fatetur, quod paulo ante ab alijs obiectum esse dicebamus, Appianum, vti præconem, ore alieno locutum, optima quæque decerpisse ex aliorum lucubrationibus; præsertim verò ex Augusti commentarijs, quos ipse de vita sua, teste

ste

ste Suetonio, composuit. Coarguit Bodinus eius anistoresiam, quod Cæsarem in Senatu capulo gladij manum admouisse dicat, cum ei postulata negarentur; dabit hic, inquiens, nisi dederitis; quod ab alijs Antonio tribuitur. Præterea memoriã eius in ius vocauit, quod stuprum Calphurniæ Publio Clodio tribuat, cum ea non Calphurnia, sed Pompeia fuerit. Vnum tamen hunc Historicũ fassus est Romanorum prouincias, opes, exercitus, totiusq; imperij descriptionem, velut in subiecta tabula nobis ad intuendum proposuisse. Quàm autem benè, & prudenter, aduersus naturæ ordinem, & contra quàm cæteri fecerunt, ipse non ex temporum serie rexuerit Historiam, sed per prouincias digesserit, in medio relinquimus.

XVI.



EMILIVS PROBVS agnoscitur, & laudatur à doctissimis viris Hieronymo Magio, Carolo Sigonio, Cælio Secundo Curione, alijsq; criticis notæ melioris. Refellitur, atq; inducitur à Dionysio Lambino, Andrea Schotto, alijsq; nonnullis, qui externarum gentium imperatores, quos habemus duos, & viginti, Cornelio Nepoti adiudicant. Mihi hæc andabatarum cæca colluctatio nusquam probatur. Quid enim attinet fallacibus coniecturis nomina autorum permuta-

G re,

re, atq; hypobolimæos nobis scriptores supponere? At quædam sunt in eo libro, quæ Probo Emilio non congruunt. Quasi verò Emilij Probi vocabulo nullus alius esse potuerit, nisi quæ ipsi mente conceperint. Maneant quæso librorum tituli, quos vetustas sancivit, atq; inuiolabiles fecit, neque importuna cuiusquæ manu sollicitentur. Quod si pergant alterius gloriam ad alterum per iniuriâ transferre, id ipsam aduersus eos ipsos futura ætas vtinam vindicet: nam quid potius à Dijs immortalibus poscam, quàm vt plagium istud in caput ipsorum posteritas regerat? vt eorum laboribus alij fruantur, eorumq; nomina, obscura, & ambigua, certæ, & mansuræ laudis nihil quicquæ obtineant. Nos interim ab Emilio Probo ~~aut~~ *nusquam* discedentes, purum illum, atq; elegantem scriptorem fate-mur: Qui etiam si Plutarcho sit minor, & quodammodo adstrictior, & dicendi genere pressior; potest tamen, quod de se, & Homero Virgilium dixisse ferunt, latifundia Plutarchi Græcis admiranda relinquere; agellumq; suum, paruum quidem, sed benè cultum, Latinis tradere: Quisquis enim Probum probè legerit, nō modò Latine loquendi simplicissimas formas; & orationem, vt de Terentiana dictum est, virginem; verum etiam reipublicæ tum bello, tum pace benè gerendæ documenta, quamplurima inueniet. Miror tamen hunc inter

Roma-

Romanarum rerum scriptores à Sigonio cenferi, cum nihil ex eo superfit, quod ad Romanos pertineat, præter fragmentum vitæ Catonis.

X V I I.

LVCIVS ANNÆVS FLORVS, duplici de causa Italiam nostris inuisus; primū quod Liuij diffusum opus in breuem quandā epitomen coarctando, in culpa fuisse videtur, propter quam diuinæ illæ meditationes perierint, cum plerique, Flori compendio contenti, Liuianā prolixitatem declinarent: Deinde quod Hispanos, Italianæ libertatis oppressores, & Romanæ ambirionis hæredes, effusis laudibus euehat. Ait enim Hispaniam ita vndiq; mari, montibusq; vallatam esse, vt ingenio fitus ne adiri quidem potuerit. Quæ laus tota Italianæ nostræ est: Cum enim natura hanc beatissimam prouinciam, Europæ, ac mundi miraculum, tribus, quibus alluitur fretis circumquaque ambire non posset, ne ex chersoneso insulam, faceret,

Excubijs Latij prætexuit Apenninum,

Claustraq; montanis vix aduenda vijs.

Silicet inuidiam timuitque, parumq; putauit

Arctius Alpes opposuisse minis;

quemadmodum eleganter dixit Rutilius. Illud etiā

Florus adiecit, Hispaniam ante à Romanis obfesa-
 sam, quàm se ipsa cognosceret, solamq; omnium
 prouinciarum vires suas postquam victa est intel-
 ligere cepisse: Cum verò se Hispanis Sertorius ad-
 uersum Romanos associaffet, nunquam aliàs ma-
 gis apparuisse Hispani militis vigorem, quam Ro-
 mano duce. Vnde, vt arbitror, liquet Florum Hi-
 spanum fuisse, & ex ea gente, quæ clarissima lumi-
 na literis dedit Lucium Annæum Senecam philoso-
 phum, & alium tragicum, & rhetorem alium, si
 modò tres illi fuere, & non duo potius, aut vnus;
 Annæum item Lucanum, & hunc ipsum Annæum
 Florum; vt tot propemodum ex Annæa stirpe do-
 cti, quot fortes ex Heraclidarum familia prodie-
 rint. Quod quidam, in scirpo nodum quærentes,
 parum prudenter in dubium reuocare conati sunt,
 qui hunc Historicum non Annæum, sed Iulium vo-
 carunt, optima quæque exēplaria refellentes, imò
 & Lactantium ipsum in os vberantes, qui hunc scri-
 ptorem Senecam appellauerit. Florus acutus est, &
 vehemens, sententijs, præceptisq; vndique scatens;
 elegans idem, disertus, amœnus, & si pauca quædā
 exceperis, quæ frigidius dicta videntur, verè flori-
 dus. Stylus tamen, non ita passim ab Historicis
 imitandus, videtur esse declamatorius, & poetico
 propior, adeo vt etiam Maroniana hemistichia,
 nonnunquam interferat. Miror autem ideo repre-
 hen-

hensum, & ineptiæ damnatum ab Sigonio, quoddam singula bella singulatim descripserit. Quis enim meliore ordine rem Romanam digesserit, præsertim si non utatur perpetua scriptione, sed per sectiones, & capita dispartita? Iustior multo illa fuerit accusatio quod in temporum ratione usque adeo negligens sit, ut non possit non hallucinari, qui illum sequatur. Inclementior in illum Verderius, Lucius, inquit, Florus breuitate sua se implicat potius, quam explicat. Quem censorem nemo non censura dignum existimet; perspicuus est enim, ac dilucidus Florus, si quis alius, quod ad eius fieri maxime potuit, cum sibi multa paucis verbis complectenda proponeret.

X V I I I.



MARCVS IUNIANVS IVSTINVS, videtur e familia Iuniorum per adoptionem translatus, ex eoq; Iunianus dictus; quemadmodum ille, ex Æmilia, gente in Corneliam ascitus, Scipio Æmilianus est appellatus. Hinc autem conijcere licet Iustinum longè esse vetustiorē, quàm plerique arbitrètur: Nam præterquàm quod elocutio pura est, ac delectatissima, quæq; Augustæ æui redoleat, toto opere præ se fert spiritus illos, animosq; Romanos. Ad hæc satis constat Pompeium Trogum floruisse illo

illo æuo; ipse enim Trogi Historiarum libro quadragésimo tertio scripsit patrem suum sub Caio Iulio Cæsare militasse. Iustinum autem fuisse Trogi discipulum scripsit ab hinc annos fermè trecentos Martinus Polonus Chronographus. Huic verò coniecturæ nihil officit nomen Antonini, quod in Iustini præfatione furtim irrepserat; illud enim esse expungendum viri eruditi iam dudum vicerunt. Illud tantum in hoc autore reprehendendum videtur, quòd eius industria Trogi Historiæ perierint: Quemadmodum Iustiniani importuna sollicitudine veterum Iurisprudentum diuina oracula intereiderunt. Et sanè hac in re tam Iustinus, quàm Iustinianus parùm iusti fuere, qui, dum gloriæ suæ student, alienæ laudi haud quaquam consuluerunt. Sed manum ad os; nam & alibi in hos breuiatores, & luxatores librorum stomachum erupimus. Arguitur quoq; à Péterio Iustinus quòd falsa, sacrisq; literis repugnantia de Mose, & Iosepho tradiderit; quasi verò homo ethnicus cū diuersæ factionis hominibus consentire debuisset. Vir est cæteroqui verax, & optimæ fidei, explicatissimæ narrationis, atque vberioris eloquentiæ, quàm à breuiatore exigì posset. Censet verò Theophilus Cangiserius hunc autorem, qui multis nominibus cognitu iucundissimus pariter, atq; vtilissimus est, assiduè, diligenterq; euoluendum, ad exemplum Augustini, Orosij,

hij,

lij, Isidori, aliorumq; magni nominis virorum, qui frequentieum lectione adeo sibi familiarem fecerunt, vt multa ex illo ad verbum transcribere, suisque ipsorum scriptis inferere non dubitauerint.

X I X.



DION CASSIVS COCCEIANVS, Niceæ, præclara Bithyniæ Vrbe, natus, clarissimo genere ortus, patre Aproniano, Ciliçiæ Proconsule, sub Commodò Senatòria gauisus dignitate, ac magnis honoribus Romæ sub varijs Principibus functus; tandem cum Alexandro Imperatore etiam secundum Consul, ab Vrbe Condita ad ætatem suam octoginta Historiarum libros conscripsit; quorum priores quatuor, & triginta, posteriores vnus & viginti desiderantur; intermedij quinque, & viginti ad manus nostras peruenerunt, incipientes à Luculli gestis, ac in obitu Claudij Cæsaris desinentes. Iacturæ culpam, quod sæpe sum quæstus, à temporis edacitate in abbreviato-rem Xiphilinum transferimus; cuius eclogas habemus à Pompeio Magno ad Alexandrum Mammeæ filium. Miram fuisse Dionis prudentiam, & dexteritatem nemo negauerit, qui videat eum, sub immanissimis, ac teterrimis belluis Commodò, Caracallo, Macrino, Heliogabalo, ita se mirifica velitatione

tatione gessisse, vt non modò ignominiam, & necē vitauerit, sed opes, & dignitatem suam retinuerit; inuidiam, quam sibi homo peregrinus potentia cōflauerat, singulari modestia pacauerit; omnemq; iniuriam, præcauendo magis, quàm propulsando, bellissimè declinauerit; donec à iustissimo, & clemētissimo Principe Alexandro, quem diximus, tanquam miles emeritus, ac rude donatus, veniā ætatis obtinuit, ac in patria consenuit. Ait enim se à bono Dæmone in somnis admonitum vt quæ à prætorianis militibus sibi pericula impendebant eo diuerticulo declinaret. Quippe ipse quoque, vti de Socrate legimus, domesticum, familiaremq; Genium habebat, cuius monitu cū vitæ actiones, tū studia quoque disposuit; eius enim impulsu ad scribendam Historiam animum applicauit; cum alioqui totus philosophiæ deditus, librum de diuinatione per somnium, & de somniorum interpretatione scripsisset. Duos autem, & viginti annos in Historiæ scriptione consumpsit; cum interim fuisset Præfectus in Ægypto, Prætor in Dalmatia, Proconsul in Pannonia. Quibus ex muneribus, & peregrinationibus illud assecutus videtur, vt ea scriberet, quæ ipse tractasset, aut quorum longè certior esse posset, quàm priuati homines. Nouerat enim causas bellorum, præerat exercitibus, vsu militarē peritiam adeptus fuerat, sciebat artes reipublicæ admi-

administrandæ, arcana ciuilis prudentiæ in Senatu ex optimatibus cognoscebat, atque adeo ipsis Imperatoribus familiaris erat, vt ei non esset difficile Dominorum consilia penitiora introspicere. Qua qui fortuna vti possunt, ij demum se se ad Historiã scribendam conferant. Obseruauit Cornelius Nepos Otacilium Pilitum primum omnium liberti-
norum ausum esse scribere historiam, non nisi ab honestissimo quoque scribi solitam. At quis non indignetur homunculos quosdam subrostrarios, & famigeratores imperitissimos, imò verò, si Dijs placet, etiam imi subsellij pædagogos de Regum mysterijs, rebusque militaribus impudentissimè disceptare? Bellè enim Cleomenes compescuit sophistam, qui de fortitudine dissertationem instituerat, cum diceret, non illam hirundini, sed aquilæ materiam pertractandam relinqui oportere. Dionem verò, qui cum principibus viris, & natus, & altus, annos amplius quadraginta rempublicam gessit, ad quam statim atque per ætatem licuit accesserat, idoneum Historiæ scriptorem meritissimò nominamus. Quem idcirco Budæus probatissimum autorem vocauit, quemque grandi stylo vti, atque in concionibus Thucydidem æmulari, sed magis perspicuum esse indicat Photius. Quas ob virtutes non dubitat Bødinus illum inter optimos scriptores censere: Comi-

H tiorum

tiorum enim, & magistratuum Romanorum, totiusq; publici iuris disciplinam accuratè collegit; Principum consecrationes, atq; apothecos primus explicauit, quem postea secutus est Herodianus; & ea, quæ Tacitus Imperij arcana vocat, penè solus euulgauit. Pungunt illum vespæ quædam aculeatæ, leui sanè ictu, quod vbique partes Cæsaris aduersus Pompeium, & Antonij contra Ciceronem studiosius defendat; quoddq; parum faueat Christianorum miraculis. Quæ tamen peccata facilè indulgenda sunt, illud quidem aulico, hoc autè philosopho. Cû porro mortalium nemo non in aliquo offendant, leuiora hæc delicta pro virtutibus esse possunt, cum de hominibus non de Dijs loquamur.

Herodianus X. X.




HERODIANVS, Dionis ferè æquæuus, homo Græcus, sed Romæ diu versatus in Aula Augusta, affectæ iam ætatis Historiam de suis temporibus scribere aggressus, neque eloquentiæ caruit laudibus, & fidem tamen in primis libertatemq; retinuit. Libellos admodum breues, ac dilucidos, & iucundos edidit, grandia veterum volumina pertæsus, quorum odiosa prolixitas studiosorum animos plerunque à lectione auertit, atq; adeo deterret. Orditur ab excessu Marci Aurelij Philosophi, subsistit verò in Balbino, & Maximo, & Gordianis. Stylus, Photio teste, ele-

gans

gans est, ac perspicuus, & planè talis, vt vix vlli Historicorum vlla virtute concedat. Fidem eius, quã vsquequaque Politianus laudauerat, præfatione in Herodianum, à se conuersum, nutare in Alexandro, & Maximino idem postea obseruauit, præfatione in Suetonium. Quamobrem à Capitolino damnatus est olim Herodianus elogio non sinceri scriptoris. Reprehensus quoque à Spartiano quod in Historia sæpenumero à veritate discefferit. Sugillatus denique à Bodino quodd non idem in eo fuerit studium veritatis inquirendæ, qui fuit in Suetonio. Cæterùm magnam in eo negociorum, personarumq; varietatem, reconditam antiquitatis Romanæ notitiam, iucundam rerum nouitatem, mira consilia, consiliorumq; euentus, graues pro tempore sententias, & plenam vbique dignitatis, plenam suauitatis orationem, copiosam quandam ad instruendos mores supellectilem documentorũ, crebraq; in vtranque partem fortunæ vacillantis exempla, Plautianumq; ad effigiẽ Seiani, quem in Tacito habemus, graphicè conformatum; denique speculum quoddam vitæ humanæ inspicere possumus, vnde ea quisque capere, atq; haurire præcepta queat, per quæ vel publicis, vel priuatis rebus præclare consulatur. Quas ob virtutes Herodianum politissimum, & iudicij non vulgaris rerum conditorem meritò Casaubonus vocauit.

tio magnam interdum affert vtilitatem, præsertim si de magnis agitur viris, quorum nullum est tam leue, tamq; domesticum dictum, aut factum, quin obseruatione dignum videatur, quod & supra notauimus. Vt transeam id esse in biographo maxime commendandum, quod in Historico forsitan vitio non vacat. Qui enim virorum principum vitam composuerunt, duos quasi parietes de vna fidelia dealbantes, mistam scriptionem ediderunt politicæ, & moralis philosophiæ, narrantes publicè gesta, & priuatim; siue, vt loquitur Suetonius, qualis quisque fuerit in imperio regendo, & quæ fuerit cuiusque interior ac familiaris vitæ consuetudo. Quod si demas necessitatem, quam nobis legendi hos minores Historicos fatalis quædam literarum calamitas imposuit, quæ meliores his vel non habuit, vel non retinuit, non eos tanti æstimes, vt eorum lectio sit repetenda; quos etiam Budæus nequaquam inter claros autores, & Romana Historia dignos putat esse connumerandos.

X X I I.

ITVS ÆLIVS LAMPRIDIUS eximitur à nonnullis expungiturq; ex eorum scriptorum albo, quorum monumenta etiam num extant: Commodum enim, Diadumenum, Helio-

Heliogabalum, & Alexandrū Spartiano assignant. Est præterea qui putet Spartianum, & Lampridiū non duos, sed vnum, & eundem esse, vocatumq; tribus nominibus Ælium Lampridium Spartianū propter generis claritatem: Hos enim trium literarum homines fuisse appellatos colligimus ex Plauto, & tria fuisse nomina patritiorum disertim Aufonius testatur; quanuis apud priscos illos Romanos mos Græcorum retineretur, qui vnico vocabulo censebantur: Olim enim, vt ait Appianus, vnum duntaxat singulis erat nomen; deinde assumpsere duo; nec multò post tertium imponi cæptum. Quis tamen nostram, atq; adeo totius penè orbis terrarum consuetudinem non magis commendet, qui, cum ex Historia Græca, & Latina didicerimus vnus vnum nomen non sufficere; tria, quatuorve nimis longa esse; ad tollendam ambiguitatem, omnesq; superuacaneæ prolixitatis ambages amputandas, duobus vnumquenque nominibus appellamus? Sed vt ad Lampridium redeam, ego, contra quàm censuit Pythagoras, nusquam de trita, & publica via deflectendum puto; Lampridiumque alium à Spartiano fuisse arbitror. Stylus Lamprij pedestris, ac humilis est, dictio parum sincera, numerus plerunque subsultans, res, nullà serie digestæ, ita relatæ, vt in mentem veniebant; nullus verborum delectus, nullus eloquentiæ apparatus.

Quæ.

Quæ tamen, vt supra dixi, vbi alij scriptores præsto non sint, videntur esse toleranda: Nam, vt Cæcilius inquit, Historia quoquo modo scripta deletat, sunt enim homines natura curiosi, & quamlibet nuda rerum cognitione capiuntur, vt qui sermunculis etiam, fabellisque ducantur.

X X I I I.

REBELLIVS POLLIO, diligens scriptor dictus à Spartiano, fuit quidem certè ita diligens, vt modum etiam excederet. Cū enim temporibus Valeriani, & Gallieni vndetriginta simul affectassent Romanum Imperium, ipse, vt numerum rotundum impleret, adiecit Valētem, alieni temporis tyrannum, quem ipse Pollio Decij tempestate rebellasse fateatur: Nempe hoc est, quod Græci dicunt seruire materiæ subiectæ, ac se se hypothesei accommodare, & iuxta Lesbiorum morem, in structura adhibere plumbeam regulam, vt non paries normæ, sed norma parieti se se patiatur aptari. Sensit hoc ille quidem, sed nimis pulchrum videbatur totidem Romæ fuisse tyrannos, quot olim Athenis fuissent, cum illa Vrbs à Lyfandro esset capta. Pudet tamen duas etiam feminas, Zenobiam, & Victoriā, inter eos numerari, qui Romanum orbem inuaserint, terrarumq; dominos barbarorum seruituti mancipare conati sint.

sint. Si enim veteres suspendio deligendam arborē decreuerunt, quòd Leontium, meretricula diobolaris, ausa esset in Theophrastum scribere; cur non aliquis Cato, qui Cæsaris imperium dedignabatur, cæpisset de suspendio cogitare, cum in mulierculis animum Cæsaris esse cognouisset? Elocutionem Pollionis Trebellij Gesnerus tersam esse ait, pauloque altius assurgere, quàm Historico conuenit. Et quidem, si cogitemus ætatem, qua vixit, nō mediocrem elegantiae laudem promeruisse videbitur; quanquam ipse de se ne mediocriter quidem sentiens, fide tantum Historica se contentum esse dicat, quam vnam custodiendam ratus, quod ad eloquentiam attinet nihil se curare profiteatur; res enim proposuisse deferre, non verba.

X X I V.

FLAVIVS VOPISCVSSYRACVSANVS
de natalium fato nomen putatur accepisse, Vopiscum enim veteres appellabāt qui e geminis, altero per abortionem excluso, ad partum legitimum duceretur. In hoc biographo, præter eruditionem, illud quoque laudamus quod omnia meliore ordine, quàm cæteri eius notæ scriptores, narrauit; in quibus pleraque, vt dixi, valde perturbata lectorem pariter turbant. In eo tantum nobis maximè reprehendendus, quod illum
pfeu-

pseudomantem, præstigiatores, planum, agyrten, impostorem psephopæten, denique pitheciū Pythagoræ, Alexandro potius Abochonitæ, quam vlli veterum philosophorum æquandum, Apollonium inquam Tyanæū, non dubitavit appellare celeberrimæ famæ, autoritatisq; sapientē, & nō modò amicum certum Deorū, sed ipsum quoq; pro Numine frequentandū; negat enim quicquam illo viro sanctius, venerabilius, diuinius inter homines fuisse; quippe qui passerulū pipilantem exaudiens, sit interpretatus eum reliquos passerēs sibi amicissimos ad Saliarem, atq; opiparam mēsam inuitare, quod asinus milij sarcinam excussisset, saccique vinculo casu effracto, grana in terram sparsa essent. Nempe ex Democrito acceperat quasdam esse volucres, quarum ex confuso sanguine nascatur serpens, quē si quis comedisset, auium inter se colloquia esset interpretaturus. Quasi verò aues ex suo garritu, animi, quo carent, sensa valeant exprimere, atque inter se confabulari, imò etiam, si Dijs placet, de rebus ad suam rempublicam pertinētibus consultare. Colligere licet ex his, alijsq; nonnullis indicijs, atq; argumentis Vopiscum ad fabulas magis, quàm ad Historias conscribendas natura fuisse procliuem; multaque, vel assentandi gratia, vel decipiendi studio, vel sibi indulgendi consuetudine, fuisse mentitum.

LVCIVS ÆLIVS SPARTIANVS, Capitolini, & Lampridij simillimus, eadem phrasi, eodemq; charactere dicendi vsus est: Vt planè, iuxta prouerbum, omnes in eodem ludo videantur edocti, eademq; fruge pasti; atque utinam non ea fruge pasti, quam sacræ Hebræorû literæ mendacij frugem vocarunt. Equidem vt Cassium Cremutius Cordus Romanorum vltimû, sic ego Iustinum Historicorum nouissimum appellarim. Quid enim postea sani coloris enituit? An non omnis Historica dictio, quasi eodem simul pestilenti sidere afflata, contabuit? Quodque miserimum est, non valdè boni per se scriptores librorum, & libellionum non tam inscitia, quàm incuria deterrimi ad nos peruenerunt; vt lecturi per salebras, & vepreta, imò etiam per murices ambulamus; atq; ex tot sentibus errorum, vix aliquot flosculos ægerrimè colligamus. Occupauit primus, tanquam Italicus Hercules, Baptista Egnatius hoc Augiæ stabulum repurgare; cui doctissimi, atque accuratissimi viri Casaubonus, & Salmasius succedere, qui ambo in hisce corruptissimis scriptoribus emendandis, atq; expurgandis egregiam sanè, & nobis valdè profuturam operâ præstiterunt; quodque tu, Vir summe, vehementer miraris, cum Casaubo-

saubonus omnia diligenter demersuisset, inuenit tamen Salmasius, quod siciliret; Vir, non opinione mea tantum, sed tuo, Domine, iudicio, communi-
que literatorum consensu, omnium, qui hodie viuunt, eruditissimus. In Spartiano multa pluribus in locis deprehenditur earundem rerum repetitio, & plurima ubique confusio. Nam quoties Seruiani eadem legas in Adriano? in cuius vita contexenda poterat sanè, debuerat certè Spartianus vel temporum seruare seriem, vel per partes sic dicenda distinguere, vt de publicè gestis, de peregrinationibus, deque priuata cetera eius vita separatim tractaret. Qui quidem ordo in alijs quoque Spartiani scriptis desideratur.

X X V I.

VLCATIVS GALLICANVS quintum Cos. dubium an ex illius Vulcatij familia, quem Sedigitum, à senis in manu digitis cognomento vocarunt, proposuerat, quemadmodum ipse scribit ad Diocletianum, omnes, qui se se Imperatores, siue iure, siue iniuria dixerunt, in literas mittere. Sed hodie nihil eius habemus, præter vitam Auidij Cassij: Quæ tamen à nonnullis Spartiano tribuitur: Cæterum viri sapientissimi Salmasius, & Vossius Vulcatiū vri ger-

manum, & genuinum autorem agnoscunt. Quamquam in miscella hac Cæsarum Historia tanta est omnium, quicunque ad eam componendam symbolum attulerunt, inter se dictionis, & ingenij congruentia; tantaq; interdum titulorum, atq; inscriptionum varietas, & inconstantia, vt Delio natatore, ac vate Tiresia sit opus ei, qui cuiusque vitæ certum, & constitutum scriptorem prodere velit. Profectò si Auidium scripsit Gallicanus, rem nobis cognitu quidem iucundam præstitisse videtur, nulli tamen sine errore imitandam; in eam enim multas, & longas aliorum epistolas transtulit, & plura penè exscripsit, quàm scripserit: Præterquàm quòd, Isocratem parum feliciter secutus, vt ille totum Helenæ encomium laudibus Thesei compleuit, sic Vulcatius laudationem Marci Aurelij, quàm vitæ Auidij Cassij scribere maluit. Nullam in hoc autore agnosco elegantiam; vt verè mihi, & candidè pronuntiasse Casaubonus videatur, cum diceret, Vulcatium quid diceret fortasse pensi habuisse; at quomodo, ne minimum quidem. Hæc singulatim de sex historiæ Augustæ scriptoribus pauca dixerimus. Nunc generatim, & carptim nonnulla dicamus. Vixerunt omnes sub Diocletiano, eisq; principibus, qui hunc proximè sunt secuti. Quatuor ex his, Spartianus videlicet, Capitolinus, Vulcatius, & Lampridius scripserunt, aut saltem scribe-

re instituerunt integram à capite ad calcem omniū purpuratorum historiam, orsi à Iulio Cæsare, qui primus Rempub. inuasit. At sciolus quidam, siue iussu Principis, siue suopte ingenio, ex his biographis videtur decerpisse quæ scitu digniora putauit, atque in hoc corpus, quod nunc ad manum habemus, digessisse. Voluit, opinor, tres epochas, & classes Cæsarum facere: primam duodecim Augustorum à Suetonio petendam; secundam ex his sex ita à se confarcinatis; tertiam denique Christianorum principum à Christianis scriptoribus maluit hauriri. Neque sanè dubitandum quin Tribonianus iste, hoc audaci facinore perpetrato, videretur sibi rem literariam præclare gessisse; cum tamē in causa fuerit, vt amplius quinquaginta historiæ Augustæ scriptores penitus interciderint, sex autē qui supersunt mutilos, ac turbidos habeamus. Crebra est in hisce scriptoribus, quemadmodum proximè in Spartiano est animaduersum, earundem rerum repetitio, multa que passim proiecta, nec suo loco posita. Cuius culpæ vt non absoluius in totum ipsos autores, ita non dubitamus maximam eius partem quæ penes hunc alienarum mercium institorem, quæ penes librarios, genus hominum, vt ait Casaubonus, perdendis literis natum, hære. Vitæ nonnullæ sunt inter hos, quas iure dicas, centonum instar, e diuersi coloris pannis fuisse confutas.

sutas. Scriptorum alibi desideres iudicium limatius, alibi diligentiam exquisitiorem; omnium maximè in Capitolino, & in quatuor alijs; minus enim est quod queramus de scriptore in primis erudito, & præcæteris accurato Flavio Vopisco, qui natu fuit minimus, aliorumque meminit omnium, præterquàm Spartiani, & Vulcatij. Quæ dos historiæ est primæ proxima, perspicua inquam rerum explicatio, & quod Græci melius dicunt, τὸ εὖ παρακολούθῳ, id nos in illis prioribus non inuenimus. Cum autem tot imperitissimorum grammaticarum verbis suas lucubrationes inquinarent, quid aliud, quàm per alienas ineptias se se ipsi traducere videntur? Verùm hos, velut in bona forma, næuos faciliè excusabunt, qui sic natura esse comparatum meminerint, nullum ut cuiusquam mortalium sine venia placuerit vnquam ingenium, quantumvis maximum. Subiectum certè habet hæc historia nobilissimum; totius nãque Augustorum vitæ pars magna necessariò hinc petenda est, vbi res per imperiũ Romanum gestæ annis fermè centum, & sexaginta describuntur. Vbi verò maior rerum varietas? vbi illustriora fortunæ ludibria? quàm memorabiles maximorum principum exitus? nam septuaginta, & eo plures, in horum temporum serie numeramus, qui vel Cæsares, vel Imperatorum nomen vsurpauerint. Adeo erant in illo principatu, quem

omnes

omnes tum metuebant, & omnes modò suspiciunt, comitia imperij turbulenta ac incerta, vt tumultuario populi concursu, aut incondito militù strepitu, interdum & per iocum, & ludum, Imperatores crearentur, & orbis terrarum dominatio in sceleris, & parricidij præmium concederet. Horum scriptorum lectio, cùm historiæ, & morù antiquorum studiosis necessaria videtur, tùm vel maximè ijs qui cognitione iuris ciuilis Romanorum delectantur. Quàm multa enim toto sparsim opere inuenias, quæ ad iuris prudentiæ studium præcipuè pertineant? Quàm multis locis aut nouum ius aliquod introductum, aut vetus antiquatum? Tot iuris prudētum actiones, & munera, & dignitates; tot principum epistolas, tot senatus consulta, tot alia publica monumenta, e scrinijs Augustorum, actis magistratuum, & populi, aut nescio vnde ex abdito eruta, quanti censemus facienda? Hæc ferè decerpimus ex magno eruditionis, & elegantix parente Casaubono, viro omnium linguarum, & disciplinarum intelligentissimo, quamquæ non minimam eius laudum putamus, tibi, DOMINICE MOLINE, cum primis amico; quam quidem beneuolentiam mutua inter vos virtutis admiratio conciliauit, aluerunt epistolæ, sanxerunt officia.



ELAVIVS EVTROPIVS decem breuissimis libris Romanam Historiam stricim complexus, Pauli Diaconi iniuria productus, ac ex conferto dilutior effectus, omnem penè dignitatem amisit; donec fidei opera Antonij Schonouij restitutus in integrum, & quodam quasi postliminio reuersus, pristinum locum recuperaret. Diaconus ille, monitu Adilbergæ, Desiderij Lingobardorum Regis filiæ, non solum autoris huius Historiam interpolam fecerat, sed ipsam penè totam inuerterat, dum multa de suo infarciret, multaq; passim adimeret, aut transferret. Militauit Eutropius sub Iuliano parabata, ac desertore, librumq; suum dedicauit Valenti: Nec satis liquet cuius ille fuerit religionis; quippe qui, in collimino tenebrarum, ac lucis constitutus, nec Pagano- rum ritus probaret, nec CHRISTO tamen dedisset nomen. Sophistam Italum vocat Suidas; eodemque nomine censetur in originibus Constantinopolitanis. Quanquam non desunt, qui hunc Eutropium historicum eundem esse contendunt cum Eutropio presbytero Africano, Augustini discipulo, qui duas ad sorores consolationes conscripsit, cuius meminere Ptolemæus Lucensis, & Raphael Volaterranus. Stylum eius improbat Vossius, vt
parum

parum concinnum : Fatetur tamen res ipsas compendio satis commodo ab Eutropio constrictas. Doctissimum fuisse Eutropium, & multa eloquentia scripsisse putat Iacobus Philippus. Antiquum Historiographum appellat Hincmanus Rhemenfis. At Sconhouius non eum inter antiquos recenset ; sed licet scripsit posterius, neque tamen, inquit, minor eloquentia, & iudicio etiam superioribus fuit eminentior. Sanè quanti eum Græci fecerint vel argumento illud erit, quod Capiton, & Pænius Eutropiani compendij metaphrasin Græcè scripserint. Duæ sunt autem omninò res, quæ famam, & gloriam scriptoribus conciliare soleant, si in alienas transferantur linguas, siq; interpretationibus illustrentur.

X X V I I I.



MMIANVS MARCELLINVS, cum esset vir Græcus, vt de se ipse testatur, Historiam Latinè scripsit, à Principatu Cæsaris Neruæ exorsus, vsque ad Valentis interitum. Suam verò inelegantiam sæpenumero excusat propterea quod aliena, sibiq; insueta lingua vtatur. Quamobrem in eundem videtur errorem incidisse, de quo valdè obiurgatus est à Marco Catone Aulus Albinus, qui res Romanas oratione Græca scriptitauit, deprecatus malæ existimationis ignominiam,

K

miniam,

miniam, si quid in suis libris parum compositè, aut minus eleganter scriptum quis deprehendisset. Stultum quippe, ac ineptum vir Sapientissimus iudicauit malle culpam deprecari, quàm culpa vacare. Videtur Ammianus ad philosophiam, quàm ad Historiam instructior. Et quidem multa frequenter inculcat ad ostentationem sapientiæ, quæ nihil ad Bacchum faciant, vt est in adagio. Hæc autem tam sæpè, tantaq; interdum prolixitate interponit, vt episodicam eius Historiam vocare possimus. Christianis eo nomine inuisus, atq; intestabilis, quod Iulianum illum desertorem Dijs miscet superis, & optimis quibusq; Principibus anteponit; cū tamē per ipsum nō steterit quominus Idolorum, ac Dæmonum cultus iterum in orbem terrarum inuheretur, omnisq; Assertoris nostri doctrina euanesceret. Doctus ceteroquē Ammianus, grauis, ac seriùs, & dignus planè cui fides à nemine abrogetur, si demas Iuliani, cuius erat miles, & parasitus, tum immodicas, tum imméritas laudes: Est enim is vnus ex eis scriptoribus, qui, quæ ipsi gesserunt, aut quibus ipsi interfuerunt, literarum monumentis consignasse existimantur, ac propterea in hac parte Xénophonti, Cæsari, & Guicciardino conferendus: Quibus omnibus haud scio an etiam præstet Gallicæ Historiæ scriptor Henricus Catarinus Dauila, generis claritate, militari gloria, do-

ctrina,

Arina, eloquentia Vir illustrissimus; & Ioannes Meursius, rerum Belgicarum scriptor luculentissimus, quem summa apud inuictissimum Daniæ Regem dignitas, altissima eruditio, gloria scriptis parata, sed virtus, præcipuè, tibi, DOMINICE MOLINE, præbuit vnice amandum, mihi etiam colendum, atque admirandum. Laudat Bodinus Ammiani candorem, ac studium inquirendæ veritatis: Is enim Principum virtutes, ac vitia, vt optimus quisque scriptor, summa fide notauit. Imitandum sibi proposuit Cornelium Tacitum: Sed cum in reliquis longè inferior sit, hoc etiam ab eo distat, quod Tacitus Romani sermonis dignitatem, vt tempora ferebant, affecutus est; Ammianus verò Latinis verbis, ac sæpius ne Latinis quidem, Græcè scripsit: Dictio eius duriuscula, atque horridior est, manca, succisa, & per quædam hyporchemata subsultans; multisq; Græcis, barbarisq; loquendi formis, verbisq; nusquam in Urbem receptis, sed ne iure quidem Latij donatis, vsquequaque referta. Priores tredecim libri desiderantur; quique superstites fuerunt, multis lacunis hiulci, multisq; erroribus tam mendosi, corrupti, ac deprauati leguntur, vt nusquam sensum elicere possimus: Quod quidem damnum, si benè conijcio, non tam ætatis iniuria nobis intulit, quàm criticorum inconsulta temeritas, multa in omnibus li-

bris, pro cuiusque libidine, inducentium, multaq;
audacter substituentium. Vnum est in quo Am-
mianum non tam laude, quàm etiam admiratione
dignum putemus, propria quædam, & graphica,
atq; instar naturæ omnium rerum expressio. Quam
tamen ille non eloquentiæ studio, sed philosophiæ
referebat acceptum.

X X I X.



EXTVS AVRELIVS VICTOR scripsit
librum de origine gentis Romanæ, Caiū
Cæsarem, & Sextum Gellium secutus,
qui ambo singulos libros eiusdem tituli, atq; argu-
menti conscripserunt, quemadmodum Victor ipse
testatur. Scripsit etiam de Imperatoribus Roma-
nis à Cæsare ad Iulianum librum vnum, item ab
Augusto ad Theodosium librum alterum. Quæ
quidem omnia styli, & dictionis diuersitas vix, aut
ne vix quidem, patitur vt credamus esse eiusdem
authoris. Probabile est duos, tresve huius nominis
fuisse, quorum vni tribuuntur etiam illustres viri,
hactenus quâ Plinio Cæcilio, quâ Cornelio Nepoti
adiudicati. Qui origines gentis Romanæ, moresq;
Imperatorum descripsit, putatur vixisse ætate
Constantij, & Iuliani. Hunc Ammianus virum.
Consularem, & Pannoniæ Proconsulem, & Vrbi
præfe-

præfectum, ænea statua cohonestatum, & sobrietatis gratia multilaudum appellat. Afer natione fuisse creditur; amore enim genialis soli deceptus, Africam vocat terrarum decus. Ethnicum illum fuisse inde constat, quod in Adriano stellam Antinoi, pusionis Adriano adamati, eiusq; pueri consecrationem, & sacrificia non improbarit. Et quidē certē fuit ille iuuenis non laude solū, sed etiam admiratione dignissimus, qui paria cum Alcestide fecerit; & quemadmodum illa pro viro Admeto vicariam subiit necem; ita hic adolescens pro hero suo, vitam producere cupiente, caput suum Orco deuouerit; ut quantum vitæ ephebo, immaturè, præterq; fatum pereunti, debebatur; tantundem, ultra pensum victuro, seni prorogaretur. Turperatus futurum si nobis diutius exprobraretur plus pietatis, & constantiæ fuisse in muliebri sexu, quàm in virili. Ingenium, & dictio Victoris Aurelij videntur speciem quandam referre Cornelij Taciti, cui tamen nihilo propior est, quàm stannum argento. Laudandus tamen conatus, & habenda gratia Victoris industriæ, quæ cum multa vndique delibauerit, cauit nobis ne plurimarum rerum ignari essemus, quarum memoria cum vetustioribus libris, vnde erant excerpta, penitus interisset.

REVUS FESTVS breuiarium scripsit rerum gestarum Populi Romani, quem libellum dicauit Valentiniano. Ex eo nihil propè vtilitatis capere possumus, quòd nimis cursim, & properanter Historiæ stadium præteruolet potius, quàm transeat. In quo reprehenditur etiam à Bodino, quod alio opusculo, aut indice potius, Romanorum prouincias attigerit, opes omiserit. Scriptor est fœculentæ, ac inquinatæ elocutionis, & suaptè natura infacundus; quod & ipse ingenuè fatetur, cum dicat se, morem calculonum secutum, qui ingentes summas æris breuib. admodum. exprimunt notis, res gestas signare, non eloqui, vt Valentinianus maiorum facta non tam legere posset, quàm numerare. Scripsit præterea, si Philandro fides adhibenda, descriptionem illam Vrbis Romæ, quæ Publij Victoris nomen hætenus prætulit. Et Rufi esse vt credamus suadet simplicissima viarum, ædiumq; recensio, & leui admodum brachio, siue potius summo digitulo Vrbis ornamenta indicata. Quæ postea latissimè profecuti sunt Blondus, & Marlianus in topographia Vrbis Romæ, & post hos item plurimi. Quorum nos quoq; exempla secuti, pluscula, & forsitan nec iniucunda, nec passim obuia, de Vrbe Roma, tribus de nostra peregrinatione libris commemorauimus.

X X X I.



PAVLVS OROSIVS HISPANVS, Diui Aurelij Augustini discipulus, eiusdem hortatur, septem Historiarum libros cōscripsit; quibus ostendit ab Orbe condito vsq; ad tempus quo illa pangebatur, hoc est quinquies mille, sexcentis, & duo de viginti annis, fœdas semper elades, atq; atrocissimas per vniuersum calamitates contigisse. Quamobrem, vt in chronicorū supplemento scribit Iacobus Philippus, opus illud de Mundi Miseria inscripsit; cuius tamen hodie titulus est *Ormeſta*: Quæ vox cuius sit linguæ, quidve significet, nemo hætenus potuit expiscari. Nisi forte sit luxatio quædam duorum vocabulorum, à notarijs, per compendia literarum, atq; apicum, celeritatis causa, scribentium, coagmentatorum, atque corruptorum; scriptumq; sit *Ormeſta*, pro eo quod est *Or. meſta*; hoc est, *Orbis meſtitia*; seu potius: *Or. m. iſta*; hoc est, *Orosij mundi hiſtoria*. Floruit Orosius sub Arcadio, & Honorio, cum Roma ab Alarico Gothorum Rege capta; Gentiles calamitatum omnium causam in Christianos conijcerent: Dijs videlicet succensentibus cultum suum antiquari, ac deleri, nonamq; religionem succrescere; quæ CHRISTVM vnicè coleret. Quam calumniam à nomine Christiano luculentissimis commentarijs remo-

remotum iuerunt disertissimi pariter, atque sanctissimi viri Arnobius, Lactantius, Augustinus, Orosius, Aquinas. Hunc Orosium ne Historici quidem nomine dignum censuit Sigonius, quem tamen Iacobus Philippus eloquentissimum vocat: Neque ab eo dissentit Gennadius, qui eius vitam conscripsit. Fatetur quoque Gherardus Vossius Orosium esse scriptorem planè utilem, quamuis in supputatione temporum sæpè errauerit: Græcosq; scriptores non legerit.

X X X I I.



ZOSIMVS, siue ille Gazæus fuerit, siue Ascalonita, siue Alexandrinus, quorum meminit Suidas, siue quispiam alius, cuius patriam, & genus ignoremus, vixit tempore Theodosij iunioris, vt Euagrius testatur. At Volaterranus ex Suida sub Anastasio Principe Zosimum floruisse contendit. In quorum sententiam tranfijt V. C. Ioannes Franciscus Corneanius, matruelis meus, ex cuius eruditissimis Symbolis multa nos in hæc nostra excerpta contulimus. Scripsit Zosimus opus chemicum de metallorum transmutatione, quod in bibliotheca Regia Lutetiæ manuscriptum seruari fama est. Scripsit item dictiones rhetoricas ex ordine literarum; enarrationem quoque in Demosthenem, & Romanæ Historiæ

riæ libros sex; quorum primus Cæsares ab Augusto usque ad Diocletianum transeunter percurrit; alij quinque fusius prosequuntur res Romanas usque ad Urbem iterum ab Alarico obsessam, Attalumq; ab eo designatum Imperatorem, posteaq; ab eodem exautoratum. Dictio Zosimi est brevis, perspicua, pura, & suavis, ut Photius iudicat in sua bibliotheca. Quo maiorem mihi bilem concitat Verderius, qui, cum aut Græcè nesciret, aut Musas Atticas à limine tantummodo salutasset, Zosimum pronuntiavit tantam redolere barbariem, ut ne meminisse quidem huius scriptoris dignum putaret. Iustius aliquanto in Zosimum Photius inuehitur, quod homo Paganus creber est in arro- dendis Christianis Principibus: Quo nomine eidem succensuere Nicephorus, & Euagrius. Quanquam Lenunclavius, eius interpretes, ac defensor, in apologia, quam pro Zosimo scripsit, ne in istis quidem fidem facillè Zosimo esse abrogandam putavit; nã & melioris religionis viris credibile est quædam hæsisse vitia, quæ, salva conscientia, verax Historicus non potuerit dissimulare. Eæ sunt enim Historici partes, ut meminerit, ex sententia Luciani, se esse oportere ἀφοβοῦν, ἀπόλιδα, ἀντίμομον, ἀβασιλευτον. Qua libertate, atq; animositate succinctus, veritatem ubique in quoscunque dicere absque vlla hæsitantia debet.



PROCOPIVS, RHETOR, & SOPHISTA CÆSARIENSIS, quæ prouinciæ Palestinæ ciuitas est, Iustiniano Imperium regente, Belisarij, cuius erat notarius, & comes, egregia facinora literis consignauit. Putat verò Bodinus Procopium Belisario suo tantum tribuisse, in eumq; ambabus manibus tot laudes concessisse, vt oratorem, non Historicum agere videatur: Ornamenta quoque Historiarum, & Græci sermonis puritatem aut nescisse, aut neglexisse. Sed quæ ad Historiam pertinent, singula certè diligenter exponit, ac res quoque leuissimas magno studio confectatur. Cum enim totius publici consilij particeps fuerit, sæpius etiam pro republica legationes obierit, non dubitat Bodinus Procopium inter selectos recensere. Cum verò singulas epistolas, decreta, fœdera, conciones vario dicendi genere, ac stylo describit, magnum verissimi scriptoris præbet argumentum. Continet eius Historia libris octo bellum Persicum, Vandalicum, & Gothicum: Quorum omnium Synopsim quandam, & cōspectum nobis exhibuit Agathias. Autor est Suidas Procopium adiecisse his nonum librum, vt, detracto sibi fræno, in Iustinianum, & coniugem eius Theodoram debaccharetur: Quem librum, quòd res non editas, & forsitan non edendas contineret,

ἀνέκδοτα nominavit, qui tamen hodie non extat: nam præter Historiæ libros octo nullum aliud habemus Procopij monumentum, quàm sex narrationes de Iustiniani edificijs. Laudandus Procopius integræ fidei, multaq; sedulitatis in Historia scribenda, quemadmodum supra dixi; cum enim à Belisarij latere nusquam discederet, rerum ab eo gestarum minutâ, certamq; notitiam videtur habuisse. Propior est Asiaticæ redundantia, quàm Atticæ copia; neque tamen verbosus nimium; & interim grauis, & politicus in epistolis, & concionibus, quas non sanè imprudenter interserit. Hûc autorem emendandum, illustrandum, & perpetuis notis augendum suscepit Vir Clarissimus Nicolaus Alemannus, quæ sua virtus Vaticanæ Bibliothecæ custodem præfecerat; qui, magno literarum incommodo, operi nondum perfectò immoritur hoc ipso anno MDCXXVI. Vtinam tanti operis lispana religioso piæ alicuius manus officio colligantur; ne nobis gloriosi labores toti pereant. Aut saltē iacturâ farciat industria Ludouici Frachettæ, magni illius Hieronymi fratris, ciuis, & amici nostri lôgè charissimi, quem honoris, & amplitudinis causa nominamus, ille enim vir acerrimi iudicij, memoriæ incredibilis, indefessæ in studio attentionis, cùm in omnibus Historijs continenter versatur, tū in Procopio legēdo, atque exornando est assiduus.



GATHIAS, MEMNONII FILIVS, natus Murinæ, quæ in Asia veterû Aëolensium colonia est, ad ostia Pythici fluminis, Iuris prudentiæ studijs addictus, ac propterea scholasticus appellatus, patronus causarû fuit Smyrnæ, vt ait Suidas. Hic, præter epigrammata, quorum egregia specimina extant adhuc in Anthologia, scripsit libros quinque de rebus gestis Iustini, cuius tempore floruit. Neque tamen omnia eius Imperij acta prosequitur, sed inde, vt ipse ait, sumpsit initium, vbi finem statuit Procopius. Vero propius est illum ethnicum fuisse, quàm Christi fidelem: neque tamen diuersæ factionis homines insectatur palàm, aut mordet, perinde ac Zosimus fecerat. Dictione vsus est florida, ac tersa; quam, suo more, vti barbaram, & sæculentam reprehendit Verderius; omni enim potius ornatu scripta sua composuit; nudamq; Historiam vetulæ, nugis sca- tenti, persimilem sibi videri dicebat: Quodq; gra- uissimos quosque scriptores fecisse compererat, dis- ceptationibus, & consilijs iudicium suum inter- posuit, & quasi arbiter datus, sententiam tulit: Quod tamen à Xenophonte, aut Cæsare, Histori- corum longè principibus, factum non video. Fius historia à Priore Sanctæ Balbinæ conuersa seruatur
in

in Vaticana, multarum bibliothecarum, spolijs, & Palatinæ in primis, superba. Eius quoque ibidem habentur epigrammata, castrata à Maximo Plānu de monachio, resectis scilicet quæ lasciuiora videbantur.

X X X V.

IORNANDES, EPISCOPVS RAVEN-
NÆ, quem tamen Gothorum Episcopum vocat Baronius; & erat ille quidem natione Gothus; non sacerdotio, claruit Iustiniani temporibus, & Magnum Cassiodorū secutus scripsit de rebus Geticis, gestisq; Romanorum, stylo planè rudi, barbaro, & agresti; nisi quod aliquantisper profecit ex assidua Flori lectione, ex quo pleraque ad verbum exscripsit. Quidam verò manuscripti codices hanc epigraphen præ se ferunt: *Iordanus Episcopi liber de origine mundi, & actibus Romanorum, caterarumq; gentium*. Quæ quidem inscriptio magis placet; tractat enim in eo libro non de Romanis tantum, sed etiam de Assyrijs, Medis, Persis, Macedonibus. Produxit autem commentarium suum usque ad annum Christi quingentesimum quinquagesimum ex supputatione Baroniana. Germanum, verumq; eius nomen fuerit ne Iornandes, an Iordanus, ambigitur: Baronius, & Vossius videntur malle Iordanum. Ego vnum esse nomen

men puto, sed vario modò barbarè scilicet, ac Latine pronuntiatum.

X X X V I



MARCELLINVS COMES ILLYRICANVS Chronicon satis accurate cōposuit ab excessu Valentis ad quartum Iustiniani consulatum, quem iniit anno CHRISTI quingentesimo trigesimo quarto. Autor est Cassiodorus hunc Marcellinum Constantinopolitanam ciuitatem, & Vrbem Hierosolymorum quatuor libellis minutissima narratione scripsisse: Caue autem putes hunc Marcellinum eundem esse cum Ammiano, qui & ipse Marcellinus vocatur, multoq; est antiquior, quippe qui scripserit sub Iuliano.

X X X V I I



BEDA PRESBYTER ANGLO-SAXO scripsit Ecclesiasticæ Anglorum Historiæ libros quinque ad Ceoluulphum Regem Northumbriæ, apud quem magno in honore fuit. Incipit autem à Iulij Cæsaris in Britanniam traiectione, definit anno CHRISTI DCCXXXI. cum triennio post diem suum sanctissimè clauserit. Egit præterea de temporum ratione, ac de sex mundi


æta-

ætatibus: Aliaq; plura scripsit ad rem Ecclesiasticam, & sacræ paginæ interpretationem pertinentia. Autor in Historia fidelis, & diligens, latinæ linguæ peritus, si quis alius eo seculo: Quamuis Bodinus adeo in aduersum nitatur, vt Bedam inconditè scripsisse, & de eo non esse magnopere laborandum affirmet. Iacobus Philippus eū vocat Græcè, & Latinè doctissimum: Albinusq; Flaccus Doctorem eximium appellat. Et fuit certè vir studiosissimus, atq; laboriosissimus; vt qui semper aut discere, aut docere, aut dictare, aut excipere dulce habuerit, quemadmodum de se ipse testatur. Baronius item literatos labores egregij viri ad extremum ferè spiritum continuatos affirmat: Creditur autem annum vitæ centesimum præteruectus. Hūc inter sanctos Ecclesia retulit, ac Venerabilem cognomento appellauit, ob insignem morum sanctimoniam, & modestiam singularem, cuius in primis à Baronio laudatur. Denique Martyrologium Romanum Bedam venerandum presbyterum, pietate, ac eruditione celeberrimum, digno, ac merito elogio condecorauit. Claruit sub Ioanne Sexto Pontifice, quo tempore Saraceni ex Africa soluentes Hispaniam inuaserunt. Quamobrem Beda literis, non tam eloquentia, quam pietate refertis, ad eam prouinciam recuperandam Christianos principes est cohortatus.

PAVLVSDIACONVS AQVILEIENSIS,
 de parentis nomine Varnefridus aliquā-
 do appellatus, Desiderij Lingobardorū
 Regis vltimi archigrammateus; victo rege suo, cap-
 tus à Carolo Magno apud hunc summo aliquan-
 diu in honore fuit; donec suspectior visus, ob prio-
 ris domini desiderium, deportatus est in Diomedis
 Insulam: Vnde ad Arichium, Principem Beneuen-
 tanum, Desiderij Regis generum, profugit; eoq;
 vita functo, monachum induit in Casinensi cano-
 bio. Duos Eutropio addidit libros à Iuliano vsque
 ad Iustinianum; totumque, vt supra notauimus,
 Eutropij breuiarium produxit, atque interpola-
 uit. Præterea scripsit Historiam Vinnulorum, qui
 postea nuncupati sunt Lingobardi, luculento, &
 plano sermone, si audiamus Sigebertum. Et sanè
 quidem in tam rudi seculo claruit ipse inter pri-
 mos, vt ait Baronius. Leo Ostiensis apud Cassio-
 dorum Paulum asserit fuisse prudentia, & sagaci-
 tate insignem. Sigebertus autem testatur, eum
 propter scientiam literarum fuisse à Carolo asci-
 tum. Iacobus Philippus Paulum ait doctrina, &
 facundia cum primis excelluisse. Vigilantissimus,
 me quidem iudice, scriptor est Paulus, & plurimi
 faciendus, quamuis rudis, ac barbarus, quod nus-
 quam

quam alibi reperire possimus, quæ ipse monumētis literarum tradiderit, si de cœuis, aut vetustioribus loquimur. Nam post alios ex recentioribus plurima de Lingobardis memoratu digna collegit, & comportauit in Historiam Taruisinam, luculentissimè, & verissimè scriptam, vt est apud Ortelium, & Picciolum, patruus meus agnatione, at charitate, educatione, & penè adoptione pater, Ioannes Bonifacius, non minus inter Philologos, & Iurisconsultos, quàm inter Historicos longè clarissimus: Quem, vt secundis, iuxta prouerbiū, melioribus vtilissimum Venetiæ nostræ, totiq; Italiæ monumentum, à se auctum, castigatum, & recognitum promat, tuum erit, Domine, vrgere, atq; impellere.

X X X I X.

 NASTASIVS ROMANVS, ex Abbate Cardinalis, & Gregorij quarti Bibliothecarius, à Leone autem quarto in Romana Synodo exautoratus, quod Ecclesiam, cui præerat, quinquennio deseruisset; transtulit e Græco Georgij Theophanis Chronicon: At vitas Pontificum vsque ad primum Nicolaum ipse composuit. Cæsar Baronius, itidem Cardinalis, & Bibliothecarius hunc antecessorem suum parum probat,

M & sæ-

& sæpè castigat, cum etiam disertim profiteatur ipsum aliquando omnia confundere, ac permiscere. Floruit autem circa annum CHRISTI sesquicentesium supra octingentesimum.

X L.



ZONARAS, sub Alexio Comneno maximis honoribus in Imperio Constantinopolitano aliquandiu perfunctus, iam senior monachum induit, institutum Basilianum professus: Scripsit vniuersalem Historiam ab origine mundi ad excessum Alexij, qui diem clausit anno asserti orbis MCXVIII. Diligentiam eius desideramus in rebus antiquis: neque tamen accuratior euasit in sui temporis euentibus enarrandis; cum multa, magnaq; ea tempestate contigerint, Oriente quodammodo cum Occidente commisso. Sed huius incuriam suppleuit Anna Comnena, Alexij Cæsaris filia, quæ, non ita perfunctoriè, neque oscitanter, vt Zonaras, patris sui facta quindecim libris amplexa, eos Alexiada vocauit: Quorum priores octo ex Augustana Bibliotheca edidit David Hefchoelius: In quibus tamen amoris paterno plus aliquanto indulsisse videtur, quam per leges Historiæ liceret: Cuius præstantissimæ Heroïdos illud extat Zonaræ elogium: Studijs erat addi-
cta,

cta, exquisitè Atticissabat, & acutissimo erat ingenio ad abstrusissimas quasque contemplationes. Egit Zonaras in Historijs suis multo melius, & accuratius Senatorem, quàm Historicum; & in his, quæ pertinent ad regimen rerum Urbaniarum plurimum valuisse existimatur: Plenus tamen, & vndique scatens portentorum, & miraculorum, alijsq; eiusmodi fabulis, quibus, vt Græculus, mirificè oblectabatur; cùm Polybium haberet, quem sibi ad imitandum proponeret, qui omnem ubique *παρὰ δόξαν* acerrimè insequitur. Cæterum noster hic alioqui, ex sententia Bodini, non contemnendus rerum gestarum scriptor, à magno Casaubono adeo nihili est habitus, vt ignominia causa appellatus sit legitimæ historiæ dehonestamentum.

ATQVE HÆC QUIDEM DE HISTORICIS ROMANIS singulatim notanda putavi. Generatim verò in Urbana disciplina, si Bodinum, aliosque cordatos viros audiamus, laudantur Dionysius, Plutarchus, Linius, Dion, Appianus, & hic ipse de quo postremo diximus Zonaras: In militari Cæsar, Velleius, Ammianus, Hircius: In utraque Polybius, ac Tacitus: In Principum arcanis, & aulica vita Tranquillus, Lampridius, Spartianus: In moribus populorum, & regionum varietate Diodorus, Melæ, Strabo: nihil enim prohibet quin &

hos quoque cum alijs recenseamus, quanquam, pro mista ratione scribendi, Geographistorici verius sunt appellandi.

FECI, DOMINE, quod mandasti; non quidem benè, sed tamen utcunque potui. Nec me fugit, cum hæc scriberem, oportere non modò in omni genere Historiarum, sed etiam in rebus agendis diu versatum esse, qui virtutes Historicorum, ac vitia notare decreuerit. Vt enim Historicus vir grauis, integer, seuerus, intelligens, disertus, & quasi vitæ tam priuatæ, quàm communis, omniumq; rerum magnarum scientia instructus esse debet: Sic eisdem excultum artibus, & doctrinis esse conuenit, qui de Historicis sententiam dicere sit paratus. Rem sanè arduam, sed hominum generi perquam vtilem; interest enim reipublicæ, vt ait Bodinus, iudicia de scriptoribus, qui in publicum exeunt, incorrupta, minimèq; deprauata videri; ne, cum alienæ industriæ modum ponere volumus, optimos quosque à scriptiōe deterreamus; nè ue qui nostro iudicio fidunt, in errorem ducantur. Quibus animi dotibus, cum ego, pusilli admodum ingenij, & nullius ferè iudicij mihi conscius, omnino destituar, coactus tamen sum imperio tuo censuram instituere quadraginta virorum, qui iam dudum inter immortales ob sapientiæ opinionem,

& pu-

& publicum famæ testimonium, omnium literatorum consensione consecrati, desierunt cum mortalibus numerari. At meum hoc, qualecunque, præiudicium nihil erit impedimento iudicio tuo, qui, cum Senator, fortuna, & virtute coeuntibus, sis constitutus melioris longè, & sanctioris Areopagi, quam ille apud Athenienses fuerit, potes iure tuo non tantum homines, sed etiam Diuos iudicare. Vale. Scribebam Taruisij VI. Cal. Nouembris, Anno asserti Orbis M DC XXVI.

*Tuus, DOMINE, futurus
quoad viam*

Balthassar Bonifacius.

L E C T O R,

IN ultimo epigrammatis versu, post primam epistolam nuncupatoriam pro, solet, lege, solent. In Plinio Cecilio extrema pagina 43. pro seniori, lege, senior. Errata præterea, quæ nos fugerunt, videbis ipse, & corrigere non grauaberis. Vale.

ORDO ROMANÆ HISTORIÆ

Legenda Adriani Politi.

Historia cognoscenda, veterum gestarū, & temporum ordinē, quānus esse solet memoria custos, prosequamur, & a primis temporibus ad vltima hæc nostra tempora, quasi filo per manus ducto, deueniamus; primus historiarū scriptor, quem nobis ad legendū proponi oportet, esto is quem ordine ceteri consequentur.

Dionysius Halicarnassensis, cuius historia cōplectitur vetustissimas Italarum, & Urbis Romæ origines, & Romanorū res gestas domi, forisq̃ vsque ad Lartem Herminium Exquillinū, & T. Virginiū Tricostrum Cœlimontanum Cōs. id est annum ab Vrbe condita CCCVII.

Titus Liuius, cuius primi tres libri ab aduentu Æneæ in Italiam, vsque ad Lartem Herminium, & T. Virginiū Tricostrum Cōs. conueniunt cum vndecim libris Dionysij, qui extant, & eadem omnino tractat, quæ Dionysius; sed brevissimè si cum Dionysio comparantur.

Eutropij primus liber ferè totus, cum iisdem tribus Liuij libris coniungendus.

Romulus	cū 1.	
Numa Pompilius		
Plu. P. Valerius		} Liu.
tar Publicola		
chi C. Marcius Coriolanus	cū 2.	

T. Liuij extremus tertius liber à Larte Herminio scilicet, & T. Virginiū Tricostrum Cōs. vsq; ad extremum decimū librum; id est ad annum ab Vrbe condita CDLXII. Quo anno fuerunt Cōs. Q. Fabius Maximus Gurges, D. Iunius Brutus Scæua, & erit decursus circiter CLV. annorum.

Eutropij extremū caput primi libri. De capta Vrbe à Gal-
lis.

L. Flori primus liber vsque ad bellum Tarentinum, & cum Pyrrō Rege.

Plutarchi L. Furius Camillus.

L. Flori extremus primus liber de seditionibus; De prima, secunda, tertia, & quarta Urbis discordia A Quinto autem Fabio Maximo D. Iunio Bruto Cōs. vsq; ad P. Cornelium Scipionem, & T. Sempronium Longum Cōs. Quibus Consulibus geri cœptum est bellum Punicum

ORDO ADRIANI POLITI.

Hoc in
loco II.
Deca
des Li-
uij de-
sideran-
tur.

tunt secundum anno videlicet DXXXVI. ab Vrbe condita, Liuij historia septuaginta quatuor annorū amissa est: in eius locum leguntur T. Liuij à Floro in compendium redacti quæ, vulgo, Epitomæ nominantur. Sunt autem isti T. Liuij liber vn decimus, ac reliqui nouem, qui eum statim sequuntur à Q. Fabio Maximo Gurgite, D. Iunio Scæna Cofs. vsque ad P. Cornelium Scipionem, Titum Sempronium Longum Cofs. atque hic erit, vt paulo ante diximus, circiter LXXIV. annorum decursus.

Plutarchi Pyrrhus.

L. Flori de bello Tarentino, & cū Pyrrho Rege, de bello Picente, de bello Salentino, de bello Vulturnensi.

L. Flori liber secundus de Primo bello Punico, de bello Ligustico, Gallico, Illyrico.

Polybij primū duo libri.

Eutropij liber secundus de Tribunis mil. cos. potestate, vsque ad initium belli Punici secundi.

Forſiā
melius
xxx &
nouem,
vt infe-
rius.

T. Liuij lib. vigeſimus, ac nouem, qui eum statim sequuntur; à P. Cornelio Scipione T. Sempronio Longo Cofs. vsque ad Seruium Sulpiciū Galbā C. Aurelium Cottam Cofs. ad annum scilicet ab Vrbe condita DLIV. Est autem decursus an-

Forſiā
mēdoſe

norum circiter XVIII. ab initio videlicet belli Punici secundi, vsque ad initium belli Macedonici primi.

Appiani Alexandrini de bello ab Annibale gesto libellus vnus.

Polybij tertius, & quartus liber præterea nonnulla in fragmentis vsque ad extremum xvij. librum. Quæ tamen quia manca sunt, & valde perturbata separari commodè poterant è tertio, & quarto lib. atque ex hoc ordine reijci.

Eutropius de bello Punico secundo, quod extremo capite tertij libri comprehensum legitur. Plutar. & Q. Fabius Maximus. M. Claudius Marcellus L. Flori historia de bello Punico secundo, quæ libro secundo legitur.

Hinc ad bellum Maced. pergendum est, quod cum Philippo Rege Persei patre gestū fuit; ideoq; post superiores cōtinuo legendi sunt.

T. Liuij lib 31. & nouem reliqui, qui eum statim consequuntur, a Seruio Sulpitio Galba. C. Aurelio Cottā Cofs. qui anno ab V.C. DLIV. Consulatum gesserat, vsq; ad Claudium Pulchrū, T. Sempronium Gracchū Cofs. id est, annū ab V.C. DLXXVII. Quo anno Istoricū bellum gerī cœptum est, & erit decursus circiter

eter XXIII. annorum.

L. Flori de bello Macedonico primo, & bello Syriaco Regis Antiochi, & de bello Aetolico.

Plutarchi M. Porcius Cato Cenforinus, seu Maior vt ab alijs appellatur.

Appiani Alexandrini liber de bello Syriaco.

Eutropii liber quartus de bello Macedonico, & de bello Syriaco, & hic est decursus ferme XXII. annorum. Ab Vrbe autē condita DLXXVII.

T. Liuii liber XLI. & reliqui quattuor qui postremi consequuntur a C. Claudio Pulchro T. Sempronio Graccho Cofs. vsque ad C. Sulpicium Gallū, M. Claudium Marcellum Cofs annum scilicet ab Vrbe C. DXXCVIII: & erit decursus XI. ferme annorum.

Plutarchi T. Quintius Flaminus.

L. Flori liber secundus de bello Istriaco, de bello Gallogræco, de bello Macedonico secundo, & de bello Illyrico.

Plutarchi L. Aemilius Paulus, qui Perseum vicit ac de Macedonia triumphauit.

Eutropii lib. 4. de bello Macedonico secundo. & hic erit decursus annorum ferme xxii.

T. Liuii lib. 46. & 13. qui proxime sequuntur a L. Floro in

epitomas redacti; nam ipsius qui erant integri perierunt, legendi a C. Sulpitio Gallo, M. Cl. Marcello Cofs. vsq; ad extremum 59. librū idest ad Mem. Aemilium Lepidum, Lucium Aurelium Orestem Cofs. annū, scilicet ab V. C. DCXVIII & erit circiter XL. annorum decursus.

Appianus Alexandrinus de rebus Lybicis, siue Carthaginiensium.

L. Flori de bello Maced. 3. de bello Punico tertio, de bello Achaico, de rebus in Hisp. gestis, de bello Numantino, ac de bello Asiatico.

Eutropii de bello Punico tertio, de bello Maced. 3. de bello Achaico, & de bello Numant.

Plutarchi C. & Tib. Gracchi. L. Flori de legib. Gracchanis, de seditione Tib. Gracchi, de seditione C. Gracchi lib. iii.

T. Liuii liber lx. ac xxx. qui deinceps illum sequuntur a M. Aemilio Lepido Oreste Cofs. vsque ad extremum xxix. librū, idest ad M. Aemilium Lepidum Volcatium Tullum Cofs. annū scilicet ab V. C. Dcxcviii. & erit ferme LX. annorum decursus.

C. Crispi Sallustii liber de bello Iugurtino

L. Flori de bello Iugurtino, de bello Allobrogico, de bello Cym-

ADRIANI POLITI.

Cymbrico, Teutonico, & Tigrino, item de bello Thracio.

L. Flori de seditione Apuliana, Drusiana, de bello, quod aduersus socios gestum est, de bello Seruili.

Eutropij de bello Iugurtino, de bello Cymbrico, de bello Sociali, de bello ciuili Mariano, & Mitridatico. Item prima pars sexti libri vsque ad bellum cum Spartaco gestum.

Plutarchi C. Marius, & L. Cornelius Sylla.

Appiani Alexandrini primus lib de bellis ciuilibus.

T. Liuij liber xcj. ac xvij. qui eum ordinem sequuntur, vsque ad extremum cvij. idest à M. Aemilio Lepido, L. Volcatio Tullo Cofs. ad C. Cl. Marcellū. L. Cornelium Lentulum Cofs. annum videlicet ab V. C. Dccv. quo anno geri ceptum est bellū ciuile Cæs. & Pomp. & erit circiter xvij annorum decursus.

Eutropij lib. vj. de bello cum Spartaco.

L. Flori de bello cum Spartaco, de bello ciuili Mariano, Sertoriano, de bello ciuili sub Lepido, de bello Mitridatico.

Plutarchi Sertorius.

L. Flori de bello Cretico, de bello Balearico, de expeditione in Cyprum: de bello Gallico, de bello Parthico.

Plutarchi L. Licinius Lucul-

lus, M. Licinius Crassus, & M. Tull. Cicero.

Dionis fragmenta trigesimali, & trigesimali sexti libri.

Appiani Alexandrini libellus de bello Mitridatico.

C. Crispi Sallustij de coniuratione Catilinæ.

Dionis liber xxxvij.

L. Flori bellum Catilinæ.

Eutropij coniuratio, & bellū Gallicum, vsque ad Cæsarem dictatorem.

C. Iulij Cæsaris commentarij de bello Gallico.

Dionis liber xxxviij. ac duo deinceps, qui eum continue sequuntur, vsque ad extremum. xl. librum.

T. Liuij liber cix. ac septem, qui deinceps eum sequuntur à Cl. Marcello, L. Cor. Lentulo Cofs. vsque ad Iulium Cæs. M. Ant. Cofs. annum scilicet, ab V. C. Dccx. quo anno Cæsar in Magistratu occisus est, & erit decursus circiter quinque annorum.

C. Iulij Cæs. de bello ciuili Alex. Africo, Hispaniensi.

Suetonij Tranquilli C. Iulius Cæsar.

L. Flori liber iv. de bello Cæsaris, ac Pompeij.

Dionis liber quadragesimus primus, ac duo sequentes vsque ad extremū quadragesimitertij.

Eutropij Caius Iul. Cæsar Dictator.

N plu-

Plutarchi Cn. Pompeius Magnus, C. Iul. Cæsar M. Porcius Cato Vticensis.

Appiani Alexandrini lib. ij. de bellis civilibus.

T. Liuij epitomę cxvij. ac xxij. qui deinceps eū ordinem sequuntur, præter quos nulli alij ad ætatem nostram peruenere, à C. Iul. Cæs. scilicet, & M. Ant. Cofs. vsque ad Neronem Claudium Drusum Germanicum T. Quintium Crispinum Cofs. Quo in Magistratu Drusus est mortuus. annum scilicet ab V. C. Dcclxv. & erit circiter xxxv. annorum decursus.

Lucij Flori extremus quartus liber de Cæs. Aug. ac reliqua deinceps omnia.

Eutropij liber septimus vsque ad Tib. Cl. Neronem Cæs. Imperatorem.

Plutarchi M. Antonius, M. Iunius Brutus.

Appiani Alexandrini de bello Illyrico, & tres extremi libri de bellis civilibus.

Dionis lib. quadragesimus quartus, ac duodecim, qui continue sequuntur, vsque ad extremum lib. quinquagesimi sexti: scilicet vsque ad Imperium Tiberij Claudij Neronis.

Suetonij Tranquilli C. Cæsar Aug. & erit decursus xxj. annorum; a Druso, scilicet & Crispino Cofs. vsque ad Sex. Pomp.

Sex. Apuleium Cofs. Quibus Cofs. Augustus obiit, & hunc annorum decursus cum superiori decursu coniungi oportebit.

Huc addemus prius & posterioris volumen Vellei Paterculi, Ioannis Zonarę annales ab V. C. vsque ad Imperium Tib. Cæsaris, & Iornandis Episcopi de Regnorum, & temporum successione, qui perpetuo, & continenti ordine, ea breuissimè cōplectuntur, quæ à Romulo vsque ad Tib. domi forisque acta sunt. Quamquam hi (quia continuata historia est) facile coniungi cum superioribus poterunt. Sic ut res cum rebus temporum cum temporibus aptissime conueniant. Id quod etiam volumus intelligi de Diodoro Siculo, de Trogo Pompeio, de Val. Max. de Paulo Orosio, & de eo qui libellum de viris Illustribus scripsit. Omnia enim aut capitibus ita distinguuntur, ut sine ullo labore ad rem præsentem accommodari possint, aut ita cōtinenti oratione perscribuntur, ut dissecari non possint, quin legentis ordinem, & cursum perturbent, ac remorentur.

Perducta igitur historia ad obitum Diui Augusti, id est (ut diximus) ad annū Urbis Dcclvj. hæc quæ sequuntur supererunt legenda, ut perpetuo ordine histo.

ADRIANI POLITI.

historiam ad hanc ætatem nostram perducamus

C. Cor. Taciti ab excessu Augusti annualium libri quinque.

Dionis lib. quadragesimus septimus, quadragesimus octauus, & quadragesimus nonus, quibus continentur res domi, forisque gestæ annorum circiter xxvj. ab excessu Cæs. Augusti ad excessū C. Caligulæ.

C. Suetonij Tranquilli Tiberius Cæsar. C. Caligula.

C. Cornelij Taciti liber vndecimus, ac reliqui qui sequuntur omnes; nam à quinto ad decimum quintū ammissi sunt.

Dionis liber lx. vsque ad excessum C. Claudij.

C. Suet. Tranq. C. Claudius Cæsar, Nero Claudius Cæsar, Sergius Galba.

Plutarchi, Sergius Galba.

Suetonij Tranq. Otho Syluius. Plutarchi, Otho Syluius.

C. Suetonij Tran. Aulus Vitellius, Vespasianus, Titus.

Flauij Ioseph lib. de bello Iudaico.

C. Suet. Tranq. Flavius Domitianus.

Ex Epitomis Ioannis Xiphilini in Dionem Cassium, Nero, Galba, Otho, Vitellius, Vespasianus, Titus.

Ioannis Zonaræ eorundem Imperatorum vitæ; quæ & ipsæ apud illum, aliæ ab alijs distin-

ctæ seorsum legi possunt, vsq; ad Iustinianum Imp. ad annum scilicet ab V. C. Mccxxj. à Christo autem nato Mxxix

Iornandus Episcopus de rebus Geticis.

Procopius de bello Gothorum, de bello Persico, de bello Vandalico.

Agathius de bello Gothorum.

Leonardus Aretinus de bello Italico aduersus Gothos.

Ioânis Zonaræ Iustinianus.

Paulus Diaconus de gestis, & origine Longobardorum.

Hinc persequenda quæ à Dione Cassio, hoc est, ex ijsdem Epitomis Xiphilini in Dionem; uñ de his scripta Dionis non extât, ab Ælio Spartiano, a Iulio Capitolino, ab Ælio Lampridio, à Trebellio Pollione, à Flavio Vopisco, à Vulcatio Gallicano, ab Herodiano, à Sexto Aurelio Victor, ab Eutropio, à Pomponio Laeto, ab Ammiano Marcellino, à Ioanne Zonara, à Niceta Choniata, postremo à Petro Messia Hispan. de Imperatoribus scripta sunt. Quæ omnia separari, & rursus componi possunt, & ex vno quoq; auctore seligi, ut singulorum Imperatorum vitæ ac res gestæ continuatè legantur.

Huc addi possunt, historia Blondi, M. Antonij Sabellici,

Leonardi Aretini, Poggij Florentini, Pauli Iouij Nouocomensis, compendium rerum Neapolitanarum, & alia huiusmodi sexcenta, quæ in lucem prodire ultimis annis, & quæ à nostris quotidie scribuntur.

Hæc sunt quæ de ordine eius Historiæ, quæ ad Romanum Imperium pertinent, legenda proponere volumus. Si qui tamen existimabunt nos fuisse in partiendis temporibus, quasque in

dissecandis tamquam in membra ac frustra quædam auctori- bus, nimium diligentes, ac superstitiosiores; eundem propemodum ordinem sequuti primum quemque auctorem, cuius partes legendas proposuimus legere totum poterunt.

Nos certè hunc ordinem, quo ad res memoriæ mandatas pertinent esse optimum, non modo iudicauimus, sed etiam experti sumus.

Nomina auctorum, qui Romanas Historias scripserunt.

Dionys. Alicarnassæus
T. Liuius

L. Florus

Eutropius

Plutarchus

Polybius

Appianus Alexandrinus

Crispus Sallustius

Dio Cassius

C. Iulius Cæsar

Suet. Tranquillus

Velleius Paterculus

Ioannes Zonara

Iornandes Episcopus

Diodorus Siculus

Pompeius Trogus

Val. Maximus

Paulus Orosius

Libellus de Viris Ill.

C. Corn. Tacitus

Flavius Ioseph de bello Iudaico.

Procopius de bello Gothorum

Agathius de bello Gothorum

Paulus Diaconus

Aelius Spartianus

Iulius Capitolinus

Aelius Lampridius

Trebellius Pollio

Flavius Vopiscus

Vulcatius Gallicanus

Herodianus

Sex. Aurelius Victor

Pomponius Lætus

Ammianus Marcellinus

Niceta Choniata

Petrus Messia

Blondi Flaufj

M. Ant. Sabellici

Poggij Florentini

Leonardi Aretini

Pauli Iouij

Compendium rerum Neapolitanarum, & recentiores.

HISTO.

HISTORIÆ LATINÆ SCRIPTORES

IVXTA ORDINEM HISTORIARVM,
Quæ ab eisdem conscriptæ sunt.

Index adprimè utilis ad historiæ cognitionem,

CONSCRIPTVS A' CAROLO SIGONIO,
Antiquitatis assertore.



- | | |
|--------------------------------------------------|---------------------------------------|
| D iodorus Siculus. Græcus. | Caius Suetonius Tranquillus. Latinus. |
| Iustinus in Epitoma Trogi Pompeij. Latinus. | Dion Nicæus Græcus. |
| Dionysius Halicarnasseus. Græcus. | Publius Cornelius Tacitus. Latinus. |
| Titus Livius Patavinus. Latinus. | Caius Iulius Cæsar. Latinus. |
| Lucij Flori Epitome duplex. Latinus. | Sextus Iulius Frontinus. Latinus. |
| Flavius Eutropius. Latinus. | Paulus Orosius. Latinus. |
| Plutarchi Cheronæi Vitæ. Græcus. | Lucius Ælius Spartianus. Latinus. |
| Caius Plinius Secundus Cæcilius Iunior. Latinus. | Caius Iulius Capitolinus. Latinus. |
| Caius Velleius Paterculus. Latinus. | Titus Ælius Lampridius. Latinus. |
| Polybius Megalopolitanus. Græcus. | Vulcatius Gallicanus. Latinus. |
| Æmilius Probus. Latinus. | Trebellius Pollio. Latinus. |
| Appianus Alexandrinus. Græcus. | Flavius Vopiscus. Latinus. |
| Caius Sallustius Crispus. Latinus. | Herodianus Alexandrinus. Græcus. |
| | Sextus Rufus. Latinus. |
| | Ammianus Marcellinus. Latinus. |
| | Zosimus Gazæus. Græcus. |
| | Iornandes Gothus. Græcus. |
| | Beda |

I N D E X

Beda Anglus. Lætinus.

Paulus Diaconus. Lætinus.

Marcellinus Comes. Lætinus.

Procopius. Græcus.

Agathius. Græcus.

Anastasius S. R. E. Bibliothecarius.

Ioannes Zonara. Græcus.

Ex recentioribus.

B Londus Flavius. Lætinus.
Pöponius Lætus. Lætinus.

Ioannes Nauclerius. Lætinus.

M. Antonius Sabellicus. Lætinus.

Ioannis Cuspiniani Cæsares.

ORDO HISTORIÆ LATINÆ,

*Vt à quoque scriptore per temporum seriem
petenda est.*

De his, quæ ante Reges in Italia, & sub Regibus Romæ gesta sunt annis CCXLIV, scripserunt.

Ab exactis Regibus ad leges XII. Tab. Ann. LVIII. quæ conscribi capta sunt Ann. ab V. Condita. CCCIII.

D Ionyfius Halicarnasæus Græcus lib. IV.

Titus Lilius. lib. I.

Lucius Florus. lib. I.

Pub. Velleius Paterculus. lib. I.

Flavius Eutropius. lib. I.

Plutarchus in Romuli, Numæ, & Poplicolæ Vitis.

Plinius de Viris Illustribus.

Paulus Orosius lib. II.

Sextus Rufus.

Ioannes Zonara. Tom. I.

Solinus. Cap. I. & II. Polyhistoris.

D Ionyfius libris VI. sequentibus.

Titus Lilius lib. ij.

Lucius Florus lib. j.

Eutropius lib. j.

Plutarchus in Poplicola, & Coriolano.

Plinius de Viris Illustribus.

Paulus Orosius libris ij.

Sextus Rufus.

Ioannes Zonara Tomo j.

Diodorus Siculus non nihil lib. xj. & xij.

CAROLI SIGONII.

A Tabulis XII. ad bellum Tarentinum, & Regis Pyrrhi, qui anno Urb. CDLXXIV. in Italiam venit., Annis CLXXI.

Dionysius pauca libro x. & xj.

Titus Livius a lib. iij. ad x.

Item ex Flori Epitome libro xj. & xij. & Historiæ libro j.

Eutropius lib. j. & ij.

Plutarchus in Camillo.

Plinius de Viris Illustribus.

Paulus Orosius lib. xj. & xij.

Sextus Rufus

Ioannes Zonara Tomo j.

Diodorus Siculus non nihil lib. xij. & xiv.

A Pyrrho ad secundum bellum Punicum, quod captum est ann. Urb. DXXXVI. Ann. LXXI.

Polybius lib. j. & ij.

Lucij Flori Epitoma a libro xij. ad xx.

Et in historia lib. j. & ij.

Eutropius lib. ij.

Plutarchus in Pyrrho, Marcello, & Fabio Max.

Plinius de Viris Illustrib.

Paulus Orosius lib. iv.

Sextus Rufus.

Ioannes Zonara Tomoj.

A bello Punico secundo usque ad tertium, quod fuit anno Urbis DCV. Ann. LXX.

Titus Livius a lib. xx. ad xlv.

Lucij Flori Epitoma a xlv. usque ad xlix.

Polybij liberis ij. iv. v. vi. & fragmenta reliquorum.

Lucij Flori historia libro ij.

Eutropius libro ij. iij. iv.

Silius Italicus lib. viij.

Plutarchus in Annibalis, Fabij Max. Scipionis, Marcelli, Catonis maioris, Pauli Æmilij, & Flamini.

Plinius de Viris Illustribus.

Æmilius Probus in Annibalis, & Catonis.

Appianus in Syrio.

Paterculus lib. j.

Paulus Orosius lib. iv.

Sextus Rufus.

Ioannes Zonara Tomo j.

A bello Punico Tertio ad Cæsarem Dictatorem, qui fuit ann. Urb. DCCVI. Ann. C.

Lucius Florus in utraque Epitoma, in Livij a lib. xlix. ad lib. cix. in alia lib. ij. & iij. Appianus in Lybico, Iberico, & Mithridatico, & primo, secundum.

I N D E X

cundoque bellorum ciuiliū.

Eutropius libro iv. & v. & vj.

Plutarchus in Gracchorum, Marij, Syllæ, Sertorij, Pompeij, Luculli, Cæsaris, Ciceronis, Catonis minoris, Antonij, & Bruti Vitis.

Cornelius Nepos in Attici vita.

Sallustius in Iugurthino, Catilinario, & Concionibus.

Diô libris xxxvij. xxxvij. xxxix. xl.

Suetonius in Cæsare.

Lucanus lib. x.

Cæsar in Commentarijs.

Paterculus lib. j. & ij.

Plinius de Viris illustribus.

Paulus Orosius libris iv. v. & vj.

Sextus Rufus.

Ioannes Zonara Tomo j.

A Cæsare Dictatore ad obitum Augusti, qui fuit anno DCCLXVII. Annis LXII.

Dion à libro xl. ad lvj. Suetonius in Cæsaris, & Augusti.

Appianus lib. ij. iij. & v. bellorum ciuiliū, & in Parthico.

Velleius Paterculus libro ij.

Cæsaris Commentaria de bello Ciuili, cum Aulo Hircio, seu Oppio.

Florus in vtraque Epitoma, Liuij ad libro cix. ad cxl. & in altera lib. iij. & iv.

Plutarchus in Cæsaris, Ciceronis, Antonij, Bruti, & Catonis.

Eutropius libris vj. & vij.

Cornelius Nepos in Attico.

Tacitus initio libri j.

Orosius libro vj.

Sextus Rufus.

Sextus Aurelius Victor.

Ioannes Zonara Tomo ij.

Zosimus libro j. Historiarum.

Iosephus Iudæus libris antiquitatum. xiv. xv. xvj. xvij.

Ab obitu Augusti ad Domitiani necem, qua fuit ann. DCCCXLIX. Annis. LXXXII.

Dion libris lvij. & lvij. Ioannes Xiphilinus in Epitoma Dionis.

Tacitus lib. xxj.

Suetonius in reliquis x. Imperatorum Vitis.

Eutropius libro vij.

Sextus Aurelius Victor.

Sextus Rufus.

Zosimus libro j.

Orosius libro vij.

Zonara Tomo ij.

Iosephus lib. xvij. xvij. xx. Antiquitatum.

Et de bello Iudaico lib. vij.

A Ner-

CAROLI SIGONII.

A Nerua Principatu ad Constantini Imperium, quod fuit ann. Urb. MLVIII. Annis CCX.

Eutropius lib. vij. & ix.
Sextus Aurelius Victor.
Sextus Rufus.
Ioannes Xiphilinus in Epitoma Dionis.
Paulus Orosius lib. vij.
Ælius Spartianus.
Iulius Capitolinus.
Ælius Lampridius.
Hærodianus Grammaticus.
Vulcatius Gallicanus.
Trebellius Pollio.
Flavius Vopiscus.

Ex recentioribus.

Pomponius Lætus.
Zosimus lib. j.
Eusebius in Chron. & Historia Ecclesiastica.
Ioannes Zonara Tomo ij.

A Constantino ad Iustiniani Imp. obitum, qui fuit anno Christi DLXV. Urbis verò MCCCXII. Ann. CCLXI.

Ex recentioribus.

Pomponius Lætus.
Eutropius lib. x.

Eusebius Pamphil. Cæsariensis in vita Constant. lib. v.
Orosius libro vij.
Sextus Aurelius Victor.
Sextus Rufus.
Ammiani Marcellini libri posteriores xvij.
Zosimus a libro ij. ad xvij.
Socrates Scholasticus in Hist. Eccles. libro ix.
Hermius Sozomenus Salaminus in Historia Ecclesiastica lib. ix.
Theodoricus Cyrensis in Historia Ecclesiastica lib. vj.
Theodoricus Scholasticus in Historia Ecclesiastica libro vj.
Euagrius Scholasticus in Hist. Ecclesiast. lib. vj.
Historia Tripartita.
Iornandes Gothus in Chronicis.
S. Hieronymi Chronica. Eusebio adiecta.
Prosper Aquilenius in Chronicis.
Procopij lib. vij.
Agathij Scholastici lib. v.
Anastasius S. R. E. Bibliothecarius in Vitis Pontificum, & Hist. Ecclesiastica.
Theophanes Isaurus.
Nicephorus Callistus in Historia Ecclesiastica.

ORDO CAROLI SIGONII.

A Iustiniano deinceps.

E Vagrius Scholasticus.
Beda Anglus.

Paulus Diaconus.

Anastasius in Vitis Rom. Pon-
tificum, & Historia Eccle-
siastica.

Ioannes Zonara Tomo iij.

F I N I S.

DOMINICO MOLINO

Veritatis assertori,

Obtrectationis, & calumnie depulsori.



Balthassar Bonifacius S. D.



*Vod vnum maximè omnium scientissimè auere solet mortaliū curiosa cupiditas, mortuum vidi ego ab inferis excitatum; nec vidi solum, sed hisce manibus contrectaui, fecique mihi adeo familiarem, vt collatis etiam capitibus de rebus arcanis colloquāmur, siue potius confabulemur. Tu mihi, Domine, rediuuium Procopium, eius inquam ἀπένδοτα, hoc est, vt eius interpres de suo addit, arcanam historiam, quam ego disperisse funditus, & ad nihilum reuertisse, si modò quicquam fuit vnquam, existimabam, integram, incolumem, ornatam, lautam, imò etiam cerussatam, & calami-
stratam ostendis. Sed & aliud portentum mirabilius ostendis; immortalem inquam Virum homuncionis pu-*

N 2 gione,

gione, tanquam Diomedis gladio, confossum, obtruncatum, & contrucidatum, Anglicana cuiusdam necromantia miraculo vitæ restitutum; de suis se hostibus ulcisci, mortuumque de viuis triumphare. Inter ampullosos Iustiniani titulos illum quoque legimus, quo se, cum de barbaris gentibus, victis, ac domitis, nomina sibi ascisceret, non solum Gothicum, & Vandalicum, sed etiam Alemannicum appellabat. Pernegatum porrò fuit à quibusdam fuisse ab eo Principe Alemannos pralio superatos, & Romano Imperio subiectos. At verò ille Princeps, præscius videlicet præclare admodum, & memorabilis olim victoria, quam vel mortuus, iamq; in atomos, & favillas reductus, post millesimum, & centesimum annum relaturus erat, eo titulo etiam tum viuis uti voluit. Nunc demum Iustinianus verè Alemannicus nuncupatur; profligato Alemanno; eiusq; ceruice deiecta, qui se supra Augustos erexerat. Quanquam verò non sua manu rem ipse confecit, sed per Rinium legatum suum, ipse tamen gessisse videtur, cuius auspicijs gestum est bellum: Quo seu iure, seu privilegio, Iustinianus, si quis quam alius, meritò gaudere & potest, & debet, qui nihil vnquam per se fortiter, aut sapienter fecisse, sed per ministros pleraque benè, ac feliciter transegisse visus est. Quis enim nesciat huic Imperatori belli gloriam à Narsete, & Belisario, pacis decora à Triboniano, ac Dorotheo fuisse parta? Si tamen, quod intra
sentio,

sentio, liberè apud te possum deponere; mihi Iustinianus nequaquam videtur bene de mortalium genere meruisse. Geminio quippe facinore, quod utrunque plerique suspiciunt, si paulo attentius rem introspicimus, ingenti posteris detrimento fuit. Nisi enim Gothos, etiam tum mitescentes, Italia nostra expulisset, nos eos nunc, omni barbarie discussa, & ruditate deterfa; optimos principes haberemus; neque aliarum nationum, longè his deteriorum, durum & crudele iugum partim pateremur, partim ceruicibus imminentem agrè iam, & summa cum difficultate depellere, ac propulsare niteremur. Et nisi huic rursus perniciofa illa incessisset libido iuris Romanorum civilis perturbandi, & veterum iuris peritorum libros destorandi, non regnaret nunc in Regiam artium Iurisprudentiam tanta stoliditas, & ignorantia, quantam ne in ipsius quidem Iustiniani ingenio fuisse Procopius putet, etiam si auriculas, ut ille ait, more asinino agigaret; quantamque neque Budaus, neque Alciatus opinari possint sub Iustiniani cranium habitasse, quem hominem ex Suida analphabetum, hoc est, ut Seneca loqueretur, elementarium, siue, ut Fulgentius, abecedarium vocarunt. Quod tamen non ipsius Iustiniani, sed auunculi eius Iustini cognomentum fuisse, Alemannus ex Procopio suo se satis probasse euidenter putauit. Neque ego quid scierit, quidve ignorauerit Iustinianus valde curandum; neque qua lingua, Græcane, an Latina, an Illyrica loqueretur accuratius inuesti-

uestigandum crediderim . Illud verò in primis contenderim , iuris civilis ordinandi solam Diui Iulij mentem fuisse capacem , ad eamque rem aggredi oportuisse animum Iustiniano φιλοσοφώτερον . Quod autem ad Procopium attinet , eiusque interpretem Alemannum , ego neutrum laudare possum . Primum enim ἀνέκδοτα illa Procopiana putidam potius rabidi cuiusdam sillographi satyram , quàm incorruptum rerum gestarum scriptoris monumentum esse pronuntio . Germanus ne commentarius ille sit , an commentitius , & adulterinus , mihi , ut verum fatear , nondum satis liquet ; & miror à Riurio non ei motam de statu questionem : Non enim minus interest rei literaria certos , & legitimos autores agnosci , quam fictos & supposititios explodi . Tum deinde historicas notas Alemanni , quanquam hominis utriusque sermonis intelligentissimi , & bonorum autorum assidua lectione doctissimi , eo nomine nequaquam laudauerim , quòd tot Iustiniani dedecora , verè , an falsò , prodiderit . Certè , si librum hunc scripsit Procopius , ingratum , & infidum se Principi sua fuisse negare non potest , à quo per omnes dignitatum gradus ad summum in Romana Repub. honoris apicem sit promotus : Ut verè de eo prædixisset Iuuenalis videatur , Si fortuna volet , fies de Rhetore Consul : nam de rubula , & magistello Præfectus Æternæ Urbis dictus est Procopius à Cesare Iustiniiano ; in quem modò , tanquam Cossi equus , detractò freno , insolenter incurrit , & furiosè de-

debaechatur. Caterum ipse sibi, suisque historijs fidem
abrogavit, cum huiuscemodi palinodiam importunissime
recantaret: Et omnem sinceri scriptoris gloriam, quam
sibi octo prioribus libris comparauerat, hisce ineditis,
qua utinam semper inedita permansissent, corripit, ac
depudicavit. Cui sanè vel pueri, quos ille in arte di-
cendi erudiebat, illud Catonis obijcere potuissent; Lau-
daris quodcunque palàm, quodcunque probaris,
Hoc caue ne rursus, leuitatis crimine, damnes.
At quomodo tandem damnat, quos paulo ante effusè lau-
dauerat, ac tantum non superis inferuerat? quomodo,
inquam, damnat? quo pudore, quave impudentia?
Non equidem lego historicum, res, vti gestæ sunt, enar-
rantem, sed intentissima voce declamatorem tragædias
excitantem. Si per alterius cuiuspiam Angli scioman-
tiam reuixerit unquam Plutarchus, qui Herodotum,
scripto in eum libro, non sine amarulentia, damnauit
malignitatis; multo acrius, & multo etiam iustius in-
uebetur in hunc Procopium, cuius profectò est Heroica
malignitas: nam quemadmodum Heroum virtus defini-
tur esse virtutis quadam hyperbole; ita huius consum-
matissima improbitas, non ineptè forsitan, improbitatis
hyperbole dici potest. In summa sic statuo, esse in hac,
cuiuscunque illa sit autoris, rhyparographia loquentiæ
satis, licentiæ nimis, insolentiæ plus nimio; multum liuo-
ris, plus odij, plurimum inscitie; parum ordinis, mi-
nus facundiæ, minimum iudicij, nihil memoriæ, minus
nihilò

nihilo sinceritatis . Quorum tamen criminum non cen-
seo Procopium temerè condemnandum : fieri enim potuit
ut ab aliquo non huius ætatis nebulone pseudo-anecdota
illa fuerint confecta , ut nos aliquando , spissa quadam
caligine circumfusi , pro Iunone crassam nebulam ample-
ctentes , inter nebulones cum ipso pariter huius syco-
phantie constructore numeraremur . Vale .

Tarvisij. V. Idus Octobr. M DC XXVII.

CAROLI SIGONII

Iudicium de Historicis,

QVI RES ROMANAS

Scripserunt, ab Vrbe condita ad Caroli
Magni Imperatoris tempora.

ACCESSERVNT

DE EISDEM SCRIPTORIBVS

Excerpta.

A BALTHASSARE BONIFACIO,

ET

Ordo Romanæ Historiæ legendæ Adriani Politi.

Superiorum permissu, & Privilegio.



V E N E T I I S, M D C XXVII.

Apud Antonium Pinellum.

CAROL RICHIE

1010 1st St. N.E.

ALBANY, N.Y. 12207

For more information, call

800-451-7272

or write to

OF THE NATIONAL ASSOCIATION

of Teachers

1010 1st St. N.E.

ALBANY, N.Y. 12207

or call 800-451-7272

or write to

1010 1st St. N.E.

ALBANY, N.Y. 12207

or call 800-451-7272

or write to

1010 1st St. N.E.

ALBANY, N.Y. 12207

or call 800-451-7272

AD LECTOREM IUDICII SIGONIANI

De Rei Romanæ Scriptoribus .



Balthassar Bonifacius .



*Ebes hunc librum , amice Lector ,
mole quidem exiguum , fructu ve-
rò plusquam mediocrem , non tam
Carolo Sigonio , qui semel compo-
suit , quàm DOMINICO MO-
LINO , qui bis ab interitu vin-
dicavit . Ipsum autographum , à
viro doctissimo Francisco Pigna , pluribus ab hinc annis
acceptum , maximus ille Venetorum Senator , & rei li-
terariæ princeps , dederat imprimendum Ciotto Typo-
grapho , cuius detestabili incuria deperijt . Hoc autem
apographum , per omnes ferè doctissimorum virorum bi-
bliothecas diu conquistum , & bono Mercurio tandem
inuentum , dat tibi , dat memoria , dat publicæ vtilitati .
Nihil est enim optatius communi huic ingeniorum paren-
ti , quàm nostram singulorum industriam excitare , ac
studijs nostris facem præferre ; summum videlicet la-
borum*

borum suorum premium existimanti, iuxta Eurysthei
sententiam, si quippiam boni ad salutem hominum confe-
rat. Idem mihi autor fuit, ut simile quiddam ex opti-
mis quibusque criticis excerptum, tibi legendum propo-
nerem quo Sigonius elenchus absolutior, tibiq; utilior,
&, nisi me fallit coniectura, etiam iucundior foret.
Ut nihil aliud, hoc certè nostra additamenta prae-
stabunt, quod saburra in nauigijs, ne pusillus admodum Sigonij
libellus ventis ludibrio esse possit. Vale.

Tarusio VI. Cal. Nouembr. M DC XXVI.

CAROLI SIGONII I V D I C I V M DE HISTORICIS,

Qui res Romanas scripserunt ab Vrbe condita
ad Caroli Magni Imp. tempora.

P O L Y B I V S. I.



Etustissimus omnium, qui nobis supersunt Historiæ Romanæ scriptorum est POLYBIVS, e Megalopoli Arcadiæ Ciuitatē oriundus, Publij Africani minoris præceptor, ac perpetuus eius in militia comes. Is

bella, tum Punica, tum quæ eodem tempore in Græcia, Asia, & Lybia gesta sunt, libris quadraginta, quorum priores quinque integri, & sextus imperfectus tantum supersunt, Ptolemæo Euergete in Ægypto regnante, Græcè conscripsit. Sed ea sunt ita crebris interpositionibus interrupta, vt, qui se præceptorem Historiarum conscribendarum ostendit, Historiæ leges quasi negligere videatur. Vtile tamen quod extat; nā maiori parte caremus.

A CÆ-

CÆSAR DICTATOR. II.

CAius Iulius Cæsar belli Gallici, & Ciuilis Pompeiani libros vndecim Commentariorum rerum à se gestarum scripsit, genere orationis, & eleganti, neque ob nimiam diligentiam odioſo. Huius cum perspicuitas, elegantiâ, & numeri mirè placent; tum latior singularum rerum, temporum, locorum, consiliorum, atq; actionum est explicatio. Ad iustam tamen Historiam non attingit; quanquam ita nihil omisisse videtur, vt, quod Cicero ait, alios à scribendo deterruerit.

SALLUSTIUS. III.

CAius Sallustius Crispus, qui Cæsaris Dictatoris, Pompeij Magni, & Marci Ciceronis, cum quo grauissimas inimicitias exercuit, tempore vixit, nobis totus perijt, quod ad libros Historiarum attinet, quas rerum Romanarum temporum suorum scripsit; eis enim Aurelius Augustinus ante annos MC. vsus in libris de Ciuitate Dei. Iugurtha, Catilina, vt eius conciones, eius specimen fuerunt. Brevis est, sed nihil non ea breuitate comprehendit. Sententijs gaudet, & antiquis verbis, acumine non inepto. De eo Martialis: Crispus Romana primus in Historia. Thucydidi ex Græcis opponitur à Quintiliano elegantiâ dicendi,

cendi, Atticâ breuitate, sententiarum crebra vſurpatione. Taxatus à Pollione Aſinio, vt nimis antiquarius, & ex Catonis Originibus verba mutatus. Trogo autem Pompeio diſplicet, quod orationibus nimis longis vtatur, ſicut etiam Thucydides.

DIODORVS SICVLVS. IV.

Diodorus Siculus Syracuſanus vixit Trium-
Viris in Rempublicam ſequentibus. Libris quadraginta, quibus Bibliothecæ nomen indidit, omnium temporum Hiſtoriam Græcè amplexus eſt. Res Romanas minus diligenter perſequitur. Ex ijs ſex primi antiquorum geſta fabuloſa ante Troianum bellum continent. In vndecim ſequentibus, quæ à bello Troiano ad Alexandri Macedonis Principatum geſta ſunt, referuntur. In reliquis autem tribus, & viginti recensentur, quæ vſque ad bellum Gallicum Caij Cæſaris Dictatoris geſta ſunt. Huius Hiſtoriæ ſeptendecim tantum libri nobis ſuperſunt: reliqui temporum iniuria perierunt.

DIONYSIVS. V.

Dionyſius Alexandri filius Halicarnaſſæus, cuius extant libri decem Græcè, & vndecimus malè verſus, res geſtas ante, & poſt Urbem Con-

A 2 ditam

ditam vsque ad bellum Tarentinum, & Regis Pyrrhi scribere aggressus est. Sed & quæ extant (maiori enim parte caremus) paucis annis post duodecim Tabulas finem scribendi faciunt. Vixit sub Augusto Romæ. Historiam, & pleraque alia, quæ non extant, scripsit. Diligens antiquitatum inuestigator. Rempublicam Romanam dilucidè ante oculos ponit; quibus initijs, quo ordine, quibus actionibus, quo consilio, quo euentu singula gesserit, egregiè ratiocinando, recenset.

TITVS LIVIVS.

VI.

Titus Liuius Patauinus, e vico Aponi, calidis aquis celebri, ab Vrbe Condita ad Neronis Drusi obitum, quì fuit Ann. Urb. DCCXII. Libros Historiarum conscripsit: Ex quibus XXXV. tantum extant, eorum quæ ante Pyrrhum, & bel-
lis Punico secundo, Philippico, Antiocheno, & Persico gesta sunt. Vixit eisdem Augusti temporibus; in quibus Historiæ finis est. Libertas maxima, prudentia non parua, dicendi copia maior, quàm diligentia: Ideoq; à Principe Caio, tanquam verbosum, & negligentem, notatum fuisse crediderim. Pollio Patauinitatem ei obijciebat. A Quintiliano autem magnopere laudatur, cumq; Herodoto, in concionibus præsertim, comparatur. Ediscendumq; pueris suadet, vt Ciceronis imitatore, *si quis, ut ait, ediscat*.

M. VA-

M. VALERIUS MAXIMVS. VII.

MArcus Valerius Maximus exemplorum novem libros scripsit, in quibus ex omnibus Historicis exempla in certos locos connectit. Vtilis est eo ipso ordine; & quod ad similem utilitatem, unicuique uti liceat exemplo. Sed dum ex omnibus elicit, qui sæpe varij inter se sunt, sæpe etiam non sibi constat. Melius fecisset si nomina Historicorum, ex quibus ea descripsit, addidisset. Tiberij Cæsaris tempore scripsit. Mira in eo adulandi ratio.

PATERCVLVVS. VIII.

CAius Velleius Paterculus Tiberij Cæsaris etiã temporibus vixit. E fragmento duorum librorum cognoscimus eum epitomen Historiarum Romanarum scripsisse. Pleraq; , imò omnia placent, quòd res ipsæ dignæ sint; neque à melioribus conscribantur. Tenuis alioqui verbis, & ordine non satis accuratus. Adulationis supra quam credi potest vitio laboravit; præsertim cum Augusti, & Tiberij Cæsaris gesta narravit.

CAIVS PLINIVS. IX.

CAius Plinius Secundus Veronensis libros triginta septem Historiæ Naturalis, qui adhuc, licet corruptissimi, extant, conscripsit. Opus varium,

rium, & multiplex, vt est ipsa Natura. In eis quicquid vel Deo immortalī, rebusque creatis conueniens est, vel vnquam vsu venit, explicatur. Diligentia maior, quàm dicendi ratio. Vixit sub Vespasiano Principe, Præfectus Classis Misenatium. Obijt sub Tito in Veseui incendio, dum eius causas indagare vellet. Pleraque alia, quæ perierunt, scripsit.

PLUTARCHVS. X.

Plutarchus Cheronæus Asiaticus, Traiani, postea Romani Principis, præceptor, vitis insignium virorum scribēdis, res gestas à Græcis, atq; Latinis conscripsit. Rerum, ac sententiarum vbertate magna. Sed, dum singulis plura, quàm ad eorum vitam pertinet, tribuit, Historia sæpius repetita, atq; concisa non assequitur, vt vel ex omnibus discamus, quæ sunt gesta, quo consilio, quo ordine. mirè tamen rerum vbertate utilis.

TACITVS. XI.

Pvblus Cornelius Tacitus, Optimus Historicus, quæ post Augusti obitum vsque ad sua tēpora acciderunt, optima fide, atque diligentia recensuit. Consilia, mores, & rerum gestarum ordinem vsq; ad Traiani Principatum egregiè scripsit. Aulicæ vitæ rationem, in Aula Palatina Domitiani,

mitiani, Neruæ, atq; Traiani Principum ipse diu versatus, eleganter explicauit. Stylus magis grauis, quàm elegans, asper enim, parumq; duriusculus est, atq; à Latinae linguæ candore discedens. Si melioris tamen reipublicę res gestas conscripssisset, proculdubio haberet Liuius æmulum, paulo Dionysio, & Sallustio inferiorem. Periere autem libri aliquot.

FRONTINVS. XII.

Sextus Iulius Frontinus stratagematum libros conscripsit, in quibus ex omnibus Historijs exēpla, in certos locos distincta, enumerat copiosè, & magna cum vtilitate; licet pleraq;, librariorum errore, ineptè sint repetita. Neruæ, & Traiani temporibus vixit.

PLINIUS IUNIOR. XIII.

Caij Plinij Cæcilij Secundi iunioris, seu alterius, Romanorum Ducum gesta nobis supersunt. Is, vt elegantia Romana haud mirabilis est, ita propter magnitudinem materiæ valde nobis utilis; licet non semel erret, & pleraque dicendo omittat. Floruit sub Traiano; Tacito amicissimus.

SVETONIVS. XIV.

CAius Suetonius Tranquillus duodecim Cæsarium vitam potius, quàm Historiam conscripsit, quæ ab alijs quærenda est. Hic eorum mores, domesticas res, ac publicas magna diligentia, ordine certo, atque perpetuo scripsit. Stylo alioqui tenui, & qui grammaticum magis, quàm Historicum sonet. Vixit sub Adriano Principe, cuius etiam epistolarum magister fuisse dicitur.

APPIANVS. XV.

Appianus Alexandrinus Sophista, Ægyptius natione, sub Adriano Imperatore, duobus & viginti libris, alià ratione, quàm cæteri, Historias Romanas prosecutus est. Prouinciæ deuiotarum ordinem secutus, res gestas in singulis prouincijs enumerat. Item bella ciuilia, quæ extant: Regium, Italicum, Hannibalicum, & alia, quæ non extant: Punicum tertium, Syriacum, Celticum, Hibericum, Mithridaticum, Parthicum extant, malè conuersa. Multis in rebus leuis, multa etiam omittit: Sed diligenter legendus, quòd pleraque ex Historijs his accreperit, quæ perierunt.

ÆMILIUS PROBUS. XVI.

AEmilius Probus eleganter Græcorum Ducum, & Punicorum, atque Catonis maioris vitam, breuiterq; conscripsit.

LUCIUS FLORUS. XVII.

LVcij Flori, qui eiusdem Adriani Imperatoris Principatu vixit, epitome duplex extat: altera Liuij, nimis concisa, carpit enim quedam insigniora; utilis tamen in his, quæ ex Liuiio amissimus: altera rerum Romanarum, quatuor libris distincta: Quæ declamatoris mihi, non Historici videtur. Dum singula bella descripsit, in singulis ineptus est.

IUSTINVS. XVIII.

Iustinus Pij Imperatoris tempore floruit. Is Trogi Pompeij librorum epitomen eleganter conscripsit. Externarum nationum post hominum memoriam res disertè enumerat; ordine non ita exacto. Rerum Romanarum mira ieiunitas; atque vt ex quadam oratione apparet, odium non leue.

DION. XIX.

DIon e Bythinia, Vrbe Nicæa oriundus, Apro-
niani filius, iterum Consul sub Alexandro Se-
B uero

uero Principe fuit. Is iussu Seueri Imperatoris Rerum Romanarum ab initio Urbis Historiam scribere aggressus, eam vsque ad Alexandri, Mammæ filij, Imperatoris tertium Consulatam libris octoginta perduxit. Ex quibus priores sex, & triginta, & posteriores viginti tres nobis defunt. Præclare autem nobis actum est, quod Ioannis Xiphilini Constantinopolitani monachi Epitome, ex quadraginta quatuor posterioribus Dionis libris confecta, superfit; quæ vitas Imperatorum omnium, excepto Pio, continens, non modicum auxilium rebus cognoscendis præbet. Ipse, vt dixi, Asiaticus est, in concionibus plus nimio loquax. Narratio verò satis diligens est; multa; Lectores docet, à Latinis prætermissa.

HERODIANVS. XX.

Herodianus Alexandrinus grammaticus, Apollonij, etiam grammatici, filius, & discipulus, libros octo Historiæ Romanæ Principum sui temporis Græcè confecit, ab obitu Marci Aurelij ad Gordiani minoris initium. Imperatorum singulorum actiones, & gesta diligenter, & certo ordine enumerat. Concionibus gaudet, sed breuibus. Acumine, breuitate, & sententiarum grauitate Sallustio comparandus. Si meliorum temporum res tanto ordine, & ea copia scripsisset, inter Græcos

cos Historicos, qui Latina memoriæ mandarunt, Principem locum proculdubio obtinuisset.

De Iulio Capitolino, Aelio Lampridio, Trebellio Pollione, Flauio Vopisco, Aelio Spartiano, & Vulcatio Gallicano, qui vno ferè tēpore, sub Diocletiano, & Constantino Magno Imperatoribus, Romanorum Principum vitas conscripsere, vix habeo quid dicam: Adeo temporum iniuria, & librariorum negligentia sunt mutili, & corrupti. Ex his tamen, quæ extant, facillè colligere possumus eos, pro temporum conditione, satis diligentes in historia conscribenda fuisse. Sed rerum dispositio, qua hi vsi sunt, minus apta; stylusq; tenuis: Pleraq; etiam dicenda omittunt; multis ineptè, quæ ad rem nihil, vel parum faciunt, additis. Et, cum breuitati studere conantur, in nimiam verbositatē incidunt, minuta quæque prosequentes. Nobis tamen chari esse debent, cum eorum temporum meliores scriptores non habeamus.

IULIUS CAPITOLINVS. XXI.

Iulius ipse Capitolinus omnium Principum Romanorum vitas in duas partes distinctas, priorem Diocletiano Augusto, posteriorem Constantino Imperatori conscripsit. Sed solummodo extant Pij, Marci, Veri, Pertinacis, Macrini, Albini, duorum Maximinorum, trium Gordianorum, Maxi-

mi, & Balbini: Reliquæ periere. Ipse citatur à Flauio Vopisco in Probi Imperatoris vita.

LAMPRIDIVS. XXII.

Titus Aelius Lampridius, eisdem Diocletiani temporibus, Romanorum Imperatorum vitas explicauit. Commodus, Heliogabalus, Alexander, nobis tantum supersunt. Reliqua non extant. Citatur à Flauio Vopisco in Probi vita inter eos, qui Romanorum Principum vitas scripserunt.

POLLIO. XXIII.

TRebellius Pollio sub Diocletiano, & Maximiano Imperatoribus, Constantio Cæsari, patri Magni Constantini, omnes Imperatores, qui à duobus Philippis vsque ad fratrem Quintillum fuerunt, tam claros, quam obscuros, ut in Aureliani vita refert Flavius Vopiscus, scripsit. Deest à Philippis ad Valerianum; nam quod extat, ab eo exordium habet.

FLAVIVS VOPISCVS. XXIV.

Flavius Vopiscus sub eisdem Principibus ad Celsum quendam vitas eorum Principum conscripsit, qui ab obitu Claudij, & eius Fratris Quintilli fuerunt vsque ad initium Imperij Diocletiani.

ni. Scripsit paulo antebellum, quod cum Persis gessit Maximianus. Extant omnia, sed librario- rum errore deprauata.

SPARTIANVS. XXV.

LVcius Ælius Spartianus, Diocletiano Imperatore, omnium eorum qui non solum in Romano Imperio Principum locum tenuere, Augustiq; appellati sunt, verum etiam illorum, qui vel Cæsarium nomine, vel quolibet alio genere, siue in famam, siue in spem Principatus venere (vt eius verbis vtar) vitas enarrauit, Galerio, & Constantino Cæsaribus iam creatis. Adrianus, Ælius Verus, Iulianus, Seuerus, Niger, Caracallus, & Geta tantum extant. Reliqua nobis desunt.

GALLICANVS. XXVI.

Vlcatius Gallicanus, qui etiam eisdem temporibus Imperatorum vitas scripsit, nobis penè totus periit, Auidij Cassij vita tantum excepta.

FLAVIUS EUTROPIVS. XXVII.

Flauius Eutropius sub Valentiniano maiore vixit: minus quidem elegans; sed cum ex Liuiio, & Sallustio res, nobis nunc ignotas, decerpserit; & omnem Historiam Romanam breuiter ab Vrbe
Condita

Condita usque ad Iuliani Principis mortem libris decem persequatur, magni à nobis fieri debet.

AMMIANVS. XXVIII.

Ammianus Marcellinus, ut ipse de se loquitur, Græcus miles, & in Latino sermone, qui suo tempore corruptissimus erat, parum versatus, Latine Historiam Romanam scribere aggressus est, ab obitu Domitiani ad Valentis Imperatoris, sub quo vixit, interitum, libris vno & triginta; ex quibus priores tredecim nobis desunt. Vbi ad temporum suorum Historiam, quæ libris, qui extant, continetur, deuenit, diligentissime, atque optima fide scripsit. Verum adeo duro, aspero, incompto, & plane barbaro sermone, ut vix quid dicat consequi possis. Librariorum quoque errore mutilus est, & deprauatus. Vtilis tamen est, ubi intellexeris; nam ea scribit, quæ meliores autores non habent.

VICTOR. XXIX.

Sextus Aurelius Victor, vir Consularis, breuiter ab Augusto ad Theodosij senioris mortem, sub quo vixit, Imperatorum vitas memorie mandauit. Nonnulla alia præterea profecutus est.

SEXTVS RVFVS. XXX.

Quid de Sexto Rufo dicam vix habeo . Vſque eo concisus eſt, vt nullam habeat Hiſtoriæ ſimilitudinem . Victorias Prouinciarum Populi Romani breuiter perſequitur, enumeratis locis, ac Ducibus: Tenui alioqui, & planè corrupto ſtyle. Vixit ſub Valentiniano maiore.

O R O S I V S. XXXI.

Paulus Oroſius Hiſpanus, indignus Hiſtorici nomine, nonnulla, ex Eutropio, & Floro excerpta, collegit . Primæ illi partes in Religione Chriſtiana laudanda, veterumq; ſuperſtitione explodenda . Vixit ſub Honorio Principe, Auguſtini, cuius diſcipulus fuit, temporibus.

Z O S I M V S. XXXII.

Zoſimus Gazæus, ſeu Aſcalonita, Græcè ſeptem libris, quorum vltimus integer, cum pleraq; alia in cæteris deſint, Hiſtoriam Romanam, temporum ſuorum, ſeu à Conſtantino ad ſua tempora conſcripſit. Vixit Theodoſij minoris Imperatoris temporibus; Gothiſ, alijsq; barbariſ Italiam, & cæteras prouincias Romanas vaſtantibus . Ipſe totus in Chriſtianiæ Religionis pietate oppugnanda; Principibusq; Romanis, qui & initiati fuerant, lace-

lacerandis versatur. Ideo, ~~se~~ falsa scribens, indignus est Historici nomine, à quo amor, & odium abesse debent, ut veritatis locus sit. Vtilis tamen est, quòd pleraq; aut ab alijs non scripta, aut temporum iniurià amissa, persequitur.

PROCOPIVS. XXXIII.

Procopius Rhetor Cæsariensis, e Palestina oriundus, Iustiniani temporibus vixit; Belisarij, præstantissimi Ducis, à secretis. Omnibus eiusdem expeditionibus, quæ multæ fuerunt, interfuit. Beliorum Gothici, Italici, tribus, Persici, duobus, Vandalici totidem libris Historias optima fide Græcè conscriptas, nobis reliquit. Diligens ipse est in scribenda Historia: Verum mediocri stylo, ac planè naturali dictione, quæ Asiaticæ propior est, quàm Atticæ; ipse enim Asiaticus fuit. Conciones, & epistolas quasdam breues interponit, haud prorsus in eò genere ineptus.

AGATHIVS. XXXIV.

Agathius Scholasticus Smyrnæus quinque libris res Iustiniani Principis, eiusq; Ducum, Belisarij, & Narsis, in Italià, Africa, Perside, & apud Byzantium gestas, post Procopium scripsit. Stylo tenui, & crebris interpositionibus confuso.

Ve-

Verum utilis est, quod ea profecutus sit, quæ meliores scriptores non habent.

IORNANDES. XXXV.

Iornandus Gothus Episcopus omnium temporum chronicon potius, quàm Historiam scripsit, ab Vrbe Condita ad Iustiniani Imperatoris tempora. Stylus barbarus est; verum Historia utilis, quod multa, ab alijs omissa, prosequatur.

MARCELLINVS. XXXVI.

Marcellinus Comes Vir Clarissimus Chronica, seu Annales scripsit ab obitu Valentis vsque ad Iustiniani annum Imperij vicesimum. In his breuiter illorum temporum Historiam, seu potius Commentarium, est satis diligenter complexus.

B E D A. XXXVII.

Beda Anglus Chronica, seu annales scripsit à mundi initio ad Imperatorem Leonem Iconomachum, cuius ætate vixit. Cum ad tempora sua deuenit, latius res explicauit. Diligens, & pius scriptor.

PAVLVS DIACONVS. XXXVIII.

Paulus Foro-iuliensis Longobardus, cognomine Varnefridus, Diaconus, octo Historiarum
C libros

libros Eutropio addidit; ab obitu Iuliani Imperatoris ad Leonis Iconomachi Constantinopolitani Principis Imperium. Satis diligens in his, quæ literis mandauit. Verùm tenui, & quasi barbara dictione. Pleraque etiam dicenda omittit. Vixit Caroli Magni Imperatoris temporibus.

ANASTASIUS. XXXIX.

A Nastasius Romanæ Ecclesiæ Bibliothecarius, Vir, pro temporum conditione, Græcis, & Latinis literis eruditus, ex Theophane Isauro, & Nicephoro Patriarcha Constantinopolitano, Græcis scriptoribus, inepto, & planè barbaro stylo, verùm optima fide, & diligentia Historiam decerp- tam Latinè conscripsit, à CHRISTI NATALI ad Michaelem seniore, cognomine Rangalos, Constantinopolitanum Imperatorem. Nobis valdè charus esse debet, quod ea, quæ nec meliores, nec peiores scriptores habeant, literarum monumentis tradiderit.

ZONARA. XL.

Ioannes Monachus Constantinopolitanus, ex Ordine Sancti Basilij, cognomento Zonara, qui olim Byzantij Magnus Drungarius, & Protosecretarius Imp. Alexij, & Ioannis Comnenorum, fuit, Historiam vniuersam Græcè, à mundi primordio

mordio usque ad obitum Alexij Comneni Constantinopolitani Imperatoris, sub quo ipse vixit, tribus; quorum primus agit de rebus Iudaicis ab exordio mundi usque; ad Hierosolymitanum excidium; alter Historiam Romanam, ab Vrbe Conditā usque ad Constantinum Magnum Imperatorem breuiter complectitur; tertius Imperatorum res gestas, à Constantino Magno usque; ad obitum Alexij Comneni continet; tomis conscripsit. Omnia ante Constantinum ineptè, & parum diligenter (de rebus latinis loquor) explicata. A Constantino Imperatore deinceps utilis est, & quod ceteres diligenter enarrentur, & quod meliores scriptores non habeant.

Hi ergo sunt quadraginta rerum Romanarum veteres scriptores, & hi quidem meliores ex his, quos temporum iniuria nobis reliquos fecit. Ex quibus plerique ordine certo, atque perpetuo omnem Historiam Romanam complexi sunt. Nonnulli autem eodem ordine quasdam eius illustriores partes sunt persecuti. De quibus quid nostræ ætatis doctissimi, simulque eruditissimi viri sentiant, quæ ipse ex eorundem ore didici, iam videre potuisti. Porro autem ex reliquis antiquis Marcum Varronem, Marcum Tullium, Cornelium Nepotem, Messalam, Solinum, Strabonem, Melam.,
Pedia-

Pedianum, Gellium, Cenforinum, Macrobius,
 Sextum Pompeium, & plerosq; alios: Item ex Ec-
 clesiasticis Eusebium, Dium Hieronymum, Ru-
 finum, Prosperum, Socratem, Theodoretum, So-
 zomenum, Cassiodorum, Theodorum, Euagrium,
 & Nicephorum hoc loco omittendos cenfeo, & in
 alias classes reijciendos; quòd aliam exquirant di-
 cendi rationem. Cùm illi, & si multa ad Historiam
 Romanã pertinentia scribant, id tamen sic agunt,
 vt in ea incurrisse potius, quàm narrare instituisse
 videantur: Hi verò res Ecclesiasticas magis con-
 scribentes, Romanas minus diligenter prosequun-
 tur. De quibus etiam, vt de superioribus feci, gra-
 uissimorum hominum iudicium propediem ad te
 mittam.

F I N I S.

نق

150

D

33

1

3